


認
眞
草
四





認 眞 草
(四)

著 繼 善 鹿

認真草卷十四

榆關草下

答茅止生書

曾於徐老師口中聞足下名。於佳刻中見足下才。於楊允諧歌樸公坐中見足下面。於宋獻孺山海道中詳足下近况。而今復親接尺書。曩爲識荆。今則投分矣。足下天下才也。胸中兵甲。筆底風雲。卽一刀札。無不頓挫跌宕。令人心折。復令人魂搖。僕雖腐儒。曼聲讀之。唾壺碎矣。天生才必有用。才如足下。而肘不懸斗大印。無是理。司馬相公知足下之深。而不以斗大印相付。無是情。然必再爲躊躇者。非過爲鄭重也。愛足下而代爲謀之忠也。足下才富年富。將來無窮建樹。有心者寶之護之。以需其機緣之自湊也。足下自於言外得之。獨僕恨不得卽待人龍爲介介爾。

回徐恆山書

弟蹣跚自策。從師相於嶺雲島月之間。殊不覺疲。蓋與諸將吏同在鼓舞中。而且馬上行吟。不覺成帙。自謂詩中有史。當爲東征紀事也。以師相急於爲社稷圖安。遂不避危險。然亦必安其身。而後可以安社稷。師相原自有見。非孟浪冒危者比。而從行之幕僚安。可知已。老父母至愛。情見乎辭。炒栗剝桃。細嚼故人之惠。邊聲入坐。塞鳥窺人。遙憶孤竹君在二三百里外。微覺異香佛裊。此或公餘相念時乎。

答王坦山書

老公祖之南。而物論譁然不平。蓋士民實有口。且其口衆。造謗者以勢寡而避之。前事乃愈明。弟竊聆輿論。慶人心之未盡死。恨末由縮地以對老公祖。悉其狀。每遇南來客。輒訊其識道貌否。近乃得之於止生。茅兄。略陳近况。固一一是坦山先生本色。且言重門洞開。絕不承行反扃舊規。因鼓掌快。卽此一節。亦見全體。又妒茅兄侍郤席。醉酒飽德。弟獨無分窺門牆。分餘瀝一匕箸也。平素恥修寒溫。豈反施於有道。然旣遇便鴻。覺其不容已於一候起居。固與世俗寒溫似之而非者。至於遼事。實食息以之。亦不敢以告。蓋兵固難言。卽樞相累有言。而可言者皆非其至者也。樞相屬請覲上。面議邊事。而疑其脫卸。不卽許。夫此事惟苦人之不肯任。不能任。旣有人肯任能任。而又不能信。擲揄之端。已屢見矣。天下事尙可言哉。總之事至於今。樞相旣已身任安危。弟輩卽以身共患難。春明卽赴寧遠矣。老公祖於邸報中細味語意。得無慨任事之難。嘆同心之寡。爲榆塞征人一入夢思耶。

答徐恆山書

船事固知台臺自任必自緊。所以叮囑者。恐台臺不知進取之期近也。事誠未易猝辦。然不遇難事。無以見有心人之拮据。趙守備六船。或亦過求精緻。且作用間有擲揄耳。老父母旣有字與袁自如。渠必有說以處此。弟可從容緩頰。未必卽於今徑代爲告減也。何在袁道則可在。弟則不可。地使然也。老父母只是盡力做去。我之力盡。師相亦必無過求之理。然弟則望老父母於此難處之事。比別人多做幾分。纔

不枉師相提挈之意。常想古人每於極難事有巧法。嗟咄立辦。執法不是法試博謀苦想。或亦可別生路數。分頭做之乎。弟書上之言。非敢謂有當。聊以附起予之義。何如何如。

答郭金谿書

承諭王父母事。自是地方公誼。弟有何不亮。年兄乃矢日耶。至於別箋媿媿。無非真人本色。然如祇以對弟言。又何妨。倘必欲伸此說。弟何敢慢。以負商推之意乎。弟原以直腸附交末。初亦謂一直足盡天下事。迨歷事務。備嘗人情事勢之變態。始信莊生所論魯國之儒一人。千變萬轉而不可窮。真善形容孔子之直者。便可作人生也。直註疏。於是不敢易言天下事。而事之中有事也。不敢輕論天下人。以人之中有人也。而論人與事。於此地尤未易言。各有欲翻之舊案。各有欲護之殘局。各有迷人之雲霧。大要有意造言。與隨聲附和者。均足以淆視聽而起波瀾。願年兄深察之也。所稱徐公祖。王父母。自是確論。蓋郡縣之事易知。守令之才易見也。至於邊事。則常別論。札中諸君子。閣可專任乎。張可卽撫乎。王可徑釋乎。毛可認真乎。收邊人另有奇策乎。結西敵尚有遺力乎。此無難見。而年兄猶未免循影響也。且年兄有所急欲釋。又有所急欲殺。而不自知其欲爲欲釋之人地者。反爲欲殺之人地。何也。此釋則彼不得獨繫。所謂事之中有事。年兄未之思也。關門諸弁。耳而目之熟矣。札中所列。原屬可用。而必曰不次之摺。曰可以重用。則材略勝此者尙多。徐應垣略似有膽。智則猶人。而以爲智足過矣。韓魏公以膽自許。又謂入粗入細。乃是經綸好手。則膽智原非二物。今天下誰其人哉。師相身任東事。其算竟局之著數。於絲棼鼎沸之時。一眼

到底不減淮陰登壇。隆中抵掌。而其提全鎮之精神者。寓緊於鬆。寓明於晦。寓遠於近。脫胎換骨而人不驚。所稱膽智。此其人歟。使師相不在師中。而天下事之去久矣。年兄好論膽智。前時曾以稱閣鳳老。而以介直無私稱師相。是全未知師相者。師相原不易知。年兄又據傳聞。循影響。使作用而令塗人可知。又安在其爲兵機。爲將略也。弟玩年兄語意。於此中事情。都似未晰。忝在深交。不敢不以正對。近者答友人書。頗發此意。併錄上。

答沈彥威書

年兄品在天地。功在國家。回部之後。未見當事者如何洗勞臣之塵。以風羣吏。而反有促尊鱸之思者。輦上君子。待夷以蹠。橫弄風雨。代人驅除。仕路真嶮巇哉。雖然。人患品不真耳。品真無不刺時目。無不憎多口。而亦無不收名安價於水落石出之後。從古真正英雄。都向人口舌中翻轉出來。則今日之事。代人驅除者。未必非年兄之功人。事理實是如此。當不以弟爲滑稽也。弟藉師相之庇。倘得竣事。卽抽簪買舟。從年兄於三江五湖間。雪夜待我。

答友人問邊事書

來教之望邊人者切矣。而不得謂之知邊人。憂邊事者深矣。而不得謂之知邊事。僕欲一一分疏。大者忌於漏泄。小者又不足言也。請以泛論談括之。從來辦大事。在不貳心之臣。而談信心。不如談盡心。蓋信心云者。持域外之觀。破盈廷之議。徹始徹終。成就一是。如作文者之有主意。誠爲先務。然必其能盡心。而後

歸祇成鹵莽。嗟嗟天下事。豈易言哉。易言者。當前立斷。略不停蓄。論事輒曰。當如此做。不當如彼做。論人輒曰。當用某申。不當用某申。兩言而決耳。夫使事與人之爲可爲否。果明白而無藏匿之端。又區分而無交涉之處。又一定而無轉變之情。則一搨兩開。利用直腸。何必勞心。然而非也。有事於此。見爲當做。合下使做乎。抑有待乎。人皆可做乎。抑須擇乎。明明去做乎。抑藏用乎。空空去做乎。抑治具乎。一不相應。而事遂裂。且此事之形在目前。我祇見目前。而形在於此。機通於彼。端於何發。尾於何竟。皆不在目前。而皆當預計。中有何人。暗藉此以爲利。後到何時。漸乘此以作弊。則當做與不當做。原共閱一絨。且漸生千變。總在當事者以深心審幾於毫芒。而默用其防範。猶恐有奇窮之事。或出意料所不及。敢以直腸立斷乎。當做者如此。卽衆見以爲不當做者。倒或不肯顯停驟止。而若陰若陽。借以神不測之用。而用人之道。亦復如是。蓋做事必用人。而用人卽是事。人卽可用。然此事當此人之才否。此用宜此人之時否。或獨用。或參用。或徑直用。或顛倒用。一不費心。能得斯人之用否。不直此也。求用之人。當前而立。而人之中。復有人焉。其人可用。其人中之人可用否。可用者在其人。我如何用其人。又何如不爲其人中之人所用。可用者在其人中之人。我如何借用其人者。以用其人中之人。若爲人所用。而實暗轉用我之人。爲我用。範圍寬而鍼線密。或同用而甲乙之邑分行。或一人而嘖笑之施並見。總之體直而用曲。直如寒暑之不易。曲如陰晴之莫測。天下未有以直爲直。而事克濟。况兵事乎。兵陰道也。本爲謀敵。而默默若爲謀己。事本由己。而

默默若人自出。試思法紀凌夷之後。何由而使之漸知奉法。士氣累敗之餘。何由而使之漸不畏敵。此豈下果著於親上。死長之誼。上止憑軍法從事之權乎。誼固近日所不能得之於縉紳。權亦從來有之。而非其所恃。恃之則有窮時矣。不因誼而若爲明誼。不因權而若爲尊權。其要在漸以習之。默以移之。脫人胎。換人骨。而微意終不以告人。用心至此。始謂能盡。盡心至此。始可自信。蓋信非事外之空主持。乃事中之實憑據。當局者良工心苦。而旁觀者何由知之。祇據傳聞。都涉影響。甚至以小人之腹。而度君子之心。無論忌者日幸其災。卽愛者亦虞其敗。甯知鈴閣起意。鬼神莫測。密令已行。居人莫覺。卽幕中參佐。日承警效。猶有不能盡知者。而人乃向行路之人。問消息從千里之外。揣是非乎。此病中於閑散者猶少。中於津要者偏多。蓋國家安危所係之地。多就中取事之人。或欲伸己前說。或欲脫人大罪。而不敢出頭露面。只得乞靈於津要。不力造邊人無根之毀譽。何以傾人聽。不巧逢津要有因之愛憎。何以入己說。而津要之人。又概有習氣。果於信己。而輕於量人。初本墮人雲霧。旣則爭己面皮。甘心爲取事之人所用。舍力與盡心之人爲敵。其見不能當盡心者之萬一。而自信過之。萬無自覺其非之日。卽偶覺之。亦萬無認錯之理。天下事尙可言哉。韓范經略西夏。首以詔中外勿得輒言邊事爲請。此信心之言也。實盡心之言也。更苦心之言也。

答陳令威書

弟乃於此地逢年兄也。然聖主憂辱之時。而有具肝膽如年兄者。又安得不於此地逢弟也。今天下何處

不苦繁文。何事不成虛套。獨山海略簡近實。蓋剝落之後。天根始復。各有職掌。惟日不足。卽好事者到此。非力苦於無暇。亦意闌於寡和耳。如貴衙門。尤事之極簡者。年兄當以亭亭玉表。助元老之精神。肅三軍之氣色。使素餐幕僚。得以世誼引重英雄。榮施多矣。

答孫魯念書

別後。每從西來人。詢老親丈動定。知肆力於文事。院考幾作冠軍。然小戰場未足示武。故留此一步耳。文事武備。不作殊觀。聖主兼求。老親丈全用。今秋筆戰。司衡者不迷五色。却步而詫何物。措大於寸管下行。八陣法。似貯甲胸中。橫戈塞下者。則虎闌相賀。得真冠軍。當與箭奪天山之音。同時奏也。老師丹衷石畫。軼范駕韓。軍中兩年。又巧生於熟。弟從旁偶窺。間得一斑。每謂此中操縱緩急。無不曲盡事體。身中人情。但幸中朝無助敵自攻者。復全遼猶運掌耳。至於弟原以君父之急。從老師於行間。何嘗有意好官。而求全者。且有捷徑之疑。欲釋此疑。無別法。只恃老師知我。始終莫討美官。使成就得一個恬字。榮於九遷矣。老親丈必以爲然。

答孫楚帷書

連捧手教。眞如面談。老師以國事爲家事。老親翁就家事做國事。斟酌身世。字字紫肯。所稱平忌者之疑。殷望者之情。從來救世豪傑。想都有此作用。老師連發三疏。以漸而深。彼氏之子。作何應法。庸險愚橫。固魔障君子。不辭獨居小人。然倘非氣運式微。畢竟也自下低著。授人以隙。仔細看來。還非上等小人。其收

權太驟。火候未到。硬摘生瓜。遂致紛紜。至使王言如辯。揭手脚忙亂。弟敢就大札迴紋讀之。曰。險而庸。橫而愚。行見其敗也。又嘗見無才小人。其柔媚時。猶是他旺運。到得忽然彊陽。便是他衰運。蓋物失其常則敗。小人失小人之常故也。故事關國家。有大氣運爲主。君子與小人相薄相盪於氣運之中。而小人往往作洗發君子之波瀾。向使不遇小人。則無轉折。不止本色無自昭揭。抑且精神或不翕聚。小人可稱自污。以成君子。特其心實未然。爲造物所弄耳。弟只以聖上之專任老師。卜國家氣運之隆。遂決小人者無能爲也。此似無奈。小人何。而求出脫之理。以稍潑心火。其實理不外是。老親丈連以松蘿賜熱腸人。有時火從心起。卽取佳惠細嚼之。氣漸平。汗微出。所謂不平事。盡向毛孔散。誠非誑語。則老親丈視弟之言。當歌耶。當哭耶。丹心一點。兩地共之。

復王中詔書

日前兒麟至關門。得拜讀老父母函教。所爲提誨者至矣。感切不肖。燕巢幕府。側聆樞輔規模次第。原非局外人所能窺測。浮言亦何足怪。獨謂國事至此。而旁觀者猶從意見門戶兩端。鼓弄風濤。輕言天下事。輕論天下人。良可浩歎。頃者關臺公祖親閱情形。亦爽然慨風聞之誣。今車營之制已成。進取之資亦備。直須機會何如耳。不肖比以催請軍需。一至都下。日僕僕諸當事之前。領項自憐。筆舌俱敝。月餘事竣。星馳赴關。咫尺家園。未遑使省。竊比古人過門之義。然數椽茅屋。五畝秫田。託在仁侯覆露之下。魂夢亦可無牽也。但得東事蚤平。便當投紱歸來。長爲詠歌雅化之民足矣。

答方仁植書

師相督師而年臺司樞。君臣師友。可謂湊泊。弟以幕僚褻手觀成。然承手教。卽以呈於師相。固知年臺諄諄於慎重。而師相原極慎重者。又知年臺切切於肅清。而師相之加意肅清。復不自減也。特地隔則情未著。心苦則迹難明。年臺卽師相高足弟子。亦烏能於目未到之處。遙爲射覆。弟之椎魯。又烏能以筆爲舌。使師相微意。粲然於年臺之肺腑。計無所出。只以打總法奉告曰。年臺今日但自審其信得師相過否耳。如信得過。則兵之進止。將之去留。應聽師相自爲之。所謂韓公必自有說也。談詩者謂詩有別才。非關學。詩有別趣。非關理。詩固然。兵爲甚。兵而謂之用。政謂別有變幻之妙。運於尋常蹊徑之先。人而謂之用。政謂別有鼓舞之權。行於尋常繩墨之外。使執定法以決進止。執成案以議去留。是尋常之事理。非兵之理也。卽如關臺舉劾。大略近之。而如尹應聘。陳九德。則又令人惋惜。尹之束伍極嚴。其車營熟練。爲諸軍冠。特氣太悍。性近忍。卽其行中亦有怨者。至於陳九德之教湖兵。則關上所重藉也。湖兵夷性。王光有。胡伯灝相繼統之。而日諫日逃。猱獠莫制。關人憂之。視爲大毒。師相拔陳九德統之。親放月糧。分毫不剋。復以恩義結其頭目。而漸去其倡亂之渠魁。衆遂心服。聽其教練。如線索在手。跪拜如意。向之大毒。今爲最得力之兵。此其人可去乎。年臺覆疏。亦一問師相意否。卽不得不爲關臺。亦略削去新加之銜。使仍以副總兵管事。無不可者。

答方仁植書

師相初到關。滿目皆逃將。是時何敢詆言誅逃。密用脫胎換骨法。新漸集。舊漸去。使人由而不知。後先汰過逃將。毛有倫、王光有、胡伯瀨、倪寵皆副總兵也。參遊都司則秦希尹、周士廉、李楨、高國楨、尙志弘、李爲瑚、田應宿、鄧茂林、史光裕、許子敬、高從龍、宋鴻儒、諸葛佐、賈登科、趙忠誥等。未易悉數。復有梁邦璧以刑部脫其罪。赴關投用。近又江朝棟以兵部咨赴關聽用。皆相繼逐之。師相何嘗不銳意肅清乎。然師相又以憐才心。用使過法。視其可集事者。卽嘉與維新。以收桑榆之效。期於有補國家事。不欲執定汰逃一路。以錮可用之才。如趙率教、魯之甲、李承先、徐連、祖大壽等。皆用之而效者。卽李秉誠亦以初到關時。戰守之具。一無所恃。以練火器爲救急之著。惟李秉誠熟其事。因撫道公舉。遂用之。三月間。教成火器手八千人。年臺試思急難時。旣用其力。獨不可稍寬其文法乎。而師相於秉誠。又未嘗不明數其罪。未嘗不奪其服色。縱操互用。鼓舞多方。非不知其爲逃將。而混及於寬政也。大要當局之運用。卽旁觀者未易悉。矧年臺在七百里外乎。且師相旣身任天下事。天下卽未能默識師相作用之意。最不宜旁撓師相鼓舞之權。蓋必使邊人知師相之能爲諸將作主。而後師相能使諸將爲疆場效命。年臺熟思之也。師相政爲心事。未徹於中外。欲於入朝時一明之。旣不可得。弟意天下事孰有大於此者。年臺何妨親到關上。一晤師相。往還不過十數日。大事便得明白矣。何如。

答劉方壺書

年臺擢大廷尉。而弟不能以一使賀。旣有西河之痛。而復不能以一使弔。豈情也哉。幕府規模如此。年臺

不督過而佳儀佳刻。種種爲不報之施。弟在此不敢受人一毛。而不敢以例雅誼。卽無可報。惟偃然受之。爾師相經營遼事。屯守已到甯遠。前哨已及三岔。敵緒地自守。以河爲界。而我之將士。鼓舞於師相之恩威。密脫其畏敵之胎。漸壯其殺敵之膽。蓋遼事不難爲。只在戰士心寒於屢敗。師相三年專用工夫於此。所謂實實算竟局之著數。虛虛提全鎮之精神者。今乃見其端矣。師相提掇將士。晝夜拮据。無一念不在復遼。遼一日未復。食能一日下咽耶。特爲事機不遠。事體非輕。闔外之進止。最忌宣泄。而朝中之議論。更苦紛紜。欲見上面陳之。而後舉大事。乃疑者以爲欲據中書堂也。咄咄許由。果竊皮冠者歟。新政初行。擲揄更甚。遼人遂有承望風旨。以排恢復之議者。以文吏則事外之生手硬攙。以武官則營中之驍將連摘。是何異於助敵自攻耶。夫以天大重擔。向苦無人著肩。既有肩之者。乃不來幫扶。反相齟齬。又頓忘事急時之情狀。以事緩而遂視擔擔之人爲無味。年臺所稱處堂之燕。真可下憂天之淚耳。弟卽豎儒。爲國事到此。眼見有復遼之機。心恨不欲復遼之人。不減於年臺之念維桑也。

答劉方壺書

樞相遠疊臣一疏。聞同鄉長者有疑言。是未細按疏中語意也。弟處幕中。此情最悉。敢再爲直解。夫疊臣之棄遼而歸。咆哮都門。人莫可如何。卽當國者。不敢訟言執之。彼固曰。舍我無人守關也。人亦曰。執彼無人可代也。而竟執之以付司敗者。非決於高陽之一語耶。疊臣大哭。語所親曰。我今落在高陽手裏。此人所共聞也。疊臣無日不爲脫疊計。舍關事別無題目。而樞相當關經營遼土。步步荒涼。皆楚人一炬所致。

從頭收拾。重開草昧。固自爲社稷計。當然初非有意與棄遼者相形。而疊臣大恐。以爲復遼事漸成。則棄遼罪莫解。人所爲厚國之藩垣者。彼以爲固己之罪案。遂百計以破恢復之事。必欲使遼受不可復之名。關現未易守之勢。而後大翻身整舊案也。其氛甚惡。其黨實繁。抵死以與邊人爲難。言路則倡而卽和。揆席則呼而立應。年臺試味年來之條陳與稟擬。其把持牽制。綫索自明。樞相苦之極矣。殺之不能。遂求遠之。蓋是時如祇爲一身計。直行己意。自是綽然。求濟國事。則大有商量在。但得肘不旁掣。挈兩河以還報吾君。卽心所欲殺。使得緩死。亦無不可。况以中外所不能殺之人。而徒認欲殺之名於己。使其畢力以撓恢復之事。忠於國計者。當何如處耶。樞相苦心苦語。俱在疏中。而所最得意者。又在待事平再議之明旨。疊臣向謂遼事平則死莫解。今則遼事平而後死可解。不得不轉其幸敗之心爲幸成。恢復其無撓乎。至於人情之有恩怨。世局之有反覆。固非身任危邊者所暇計也。此語可爲年臺道爾。

答劉方壺書

徐恆山之無媿爲漁陽太守也。得年臺數語。留品格於兩間。卽徒步歸田。固甘之爾。夫以肩重擔之樞相。欲培養一人以爲榆關後勁而不可得。尙何言哉。時事驚心。不獨此車營驍將。所恃爲渡河前驅者。一疏而摘其二。廠衛之使。復絡繹關門。如此地方。而撓亂接踵。邊人救過不遑。何以禦敵。年臺悉其情否。

答萬同字書

師相之服王堂翁知人善任也。曰。用萬於撫。用葉於密。自是老手。故於五防之敍。必以兩兄爲惓惓。蓋公

論也。弟每私相謂。使寅翁而得一意爲師相佐下風。不以時值紛紜。自晦其心事。功烈可勝道哉。師相至今每對衆謂。恨不獲竟萬之才。萬亦應自恨未獲竟其才於我。寅翁在二千里外。終當以師相爲知己也。讀故人書。如見故人。李爾叨叨。而非敢以貌言。

答方仁植書

前付報章。只求剖明。不無傷慧。亦與國家事對同心友。不得不然而年臺之轉圜也。則今人中古誼耳。陳將軍既藉年臺主持。可竟其用矣。前小啓。經師相閱過而後發。今得手教。卽以呈師相。莞爾可知。今而後邊將猶得展四體以報師相。是廟社福也。至進兵一事。原未易言。年來避敵有如避虎。師相提掇鼓舞。總以默轉其避敵之心。日習當敵之技。人可當敵。則說進說守。總是一事。而必欲緘口諱進字。是使人默默習避字也。三軍之氣。無言而自索矣。事尙可爲哉。况兵原無定形。那得預先執定一說。師相三年於此。作用難向人言。人有描畫者。非據己所見而影爲猜。則據人所傳而聲爲吠。卽愛我仇我。主意不同。其無當於情實則一耳。以年臺爲衣鉢正傳。是可當面印可。故前有奉邀赴關之說。年臺且難於無故。弟何執而回部耶。卽使師相不容於時。不獲竟東方之事。亦相率歸田耳。回部則何敢。

答李萍槎書

回首涼庭。冬復春矣。關外氣象。比涼庭所談。日王一日矣。大約士氣奮揚。爭求出關。經理河西。觀變河東。總師相提掇鼓舞之效。使天祚我明。得竟其用。三韓唾手歸版圖耳。弟褻手素餐。旣強顏以對戰士。復循

部俸轉官。卽初隨師相。原以蹈危。三年來憑藉洪庇。未見危形。更稱安地。有蹈危之名。而享居安之實。不三禡已及。寬政矧序。轉耶。恭喜年臺。乃爲八十子之夫子。公門桃李。立見爲夾日五龍。足快也。諷詠不朽之業。併致師相。前得收帖附繳。別諭一一領悉。此君善士。師相雅重之。前被波及。特爲湔浣。然專官原係特設。他營反失初意。弟於將吏事。從無敢與。今承年臺之教。妄認則自欺。直陳又近諉。其實則此君之可無過慮。所得於旁觀者頗真。年臺當轉使安心也。弟生平本色如是。年臺豈以爲不可信。

與王翌聖書

十二車營盡已教成。師相於八月廿八日升堂具禮。拜營將而遣之。次第盡出關外。松錦、右屯一帶。各以屯種爲名。兵法虛虛實實。難以預洩。良工苦心。固不止以愚敵人也。明知中朝有不悅恢復之事者。一面出師。一面告病。不得已而陰陽之。乃朝士覷破欲進之意。卽佯信其請告之詞。而欲以騎劫代乎。三年來千辛萬苦。所辦垂成之緒。廢於一旦。此岳武穆之所以慟哭於金牌十二也。於師相身上。有何不可。獨可爲宗社慟耳。會議云何。惟老親丈詳以教我。師相必不趨朝。弟亦必不還部。近日所備乾糧煤炒。唾手爲渡河之用者。今且爲歸田之用矣。

與兵垣書

年來搖亂邊事者。騰虛冒之謗。以行簡汰之說。邊人承望風旨。以苟目前之富貴。遂有任事八逾月。祇點得一逼兵。且以各營自報之逃。故爲自己清汰之數。又有任事八逾月。祇算得一逼帳。且圈哄各營認無

實之罪。使自割再辯之舌。噫嘻。十萬之師。果可滅哉。試問邊人。二三年前之事。歷歷可想。向也。日聞敵人。一馬金一馬銀。買都令通虎口。今何不聞甯前屯種二百餘里。何無敢擾亂。東哨斬獲一百餘級。何無敢承認。而敵人築邊拒河。斥堠刁斗。其防我甚於我之防彼。何以故。而都門向聞苦求外補。偷送家眷。鄉邑每聞浮海買山之情。中原每聞斬木揭竿之變。今皆不聞。又何以故。蓋自十萬之師。布列於關之內外。兵力既集。兵威自振。游徼往來。嬰之者碎。東方與中土。氣機相倚。東方甯而中土晏然。此理之明白易見者。今受其成而迷其故。日云滅兵。所當滅者何兵耶。豈欲滅川。浙之步兵。又豈欲滅新集之遼兵。是必先滅七鎮。更番之馬兵。又必滅總兵各招之家丁。而後當於滅兵之旨。兵滅則將亦當省留。一總兵足矣。一將去。其得力之親丁。皆隨之去。夫兵滅何難。獨聚之時難耳。當河西兵潰。退守山海之時。關上何兵哉。落落南營。無甲無馬。無車無礮。徒持黏雀之竿。而云以當大敵。迄今回首。猶可寒心。當事者初到。攢零合整。剛得甲士三千。立騎兵營。關門於是日始有此一旅。由是而量爲抽調。由是而漸爲招集。始有今日之師。今日滅兵。累歲之蒐羅。何足供一日之清汰。特恐兵從此少。事從此多耳。夫三軍之氣。彼此依倚。怯者倚勇。亦自有膽。拙者倚巧。亦自生心。生者倚熟。亦自成技。今云所滅之數不多。夫兵有去一人而三軍無色者。何不一思也。或云。滅非滅其壯。特滅其弱。夫兵安能皆壯。用兵安能去弱。弱者固仗壯者以作氣。壯者亦借弱者以助威。去壯是銷弱者之氣。去弱是薄壯者之威。去者去。而留者亦歸於無用。率是以行。關上二三年前之景象。復見於今矣。朝士亦恐重見二三年前之面目。而中土累能不似二三年前之光景否。

事果如彼。能聽其淪胥而不一爲料理否。如其料理。能不需兵否。需兵而已散之兵。能再集否。卽再集而事在危急。能待其集否。事到無及。而減兵者之肉。猶足食否。願及今一思之也。且減兵之旨。爲省餉也。天下事爲於從容時自省。爲於急難時自費急而益急。則費而益費。向經急難以開此費。今幸不益其急。遂得不益其費。使厭今日之爲費。而一意求省兵。減則爲兵而買之馬。爲兵而造之器。爲兵而討之金錢。皆以兵去無所用。前費總成空。卽兵再集。而前不非散佚。則敵壞。重爲主辦。後費更不貲。費耶省耶。况事不論所關之重輕。而只以省爲美談。與其求省。曷若罷費。與其減兵。曷若散兵。且省餉云者。爲餉不足供費。而求省也。今之遼餉。以遼爲名。果盡歸遼用。而猶不足。而過求於餉額之外耶。遼餉六百萬。今分與遼用。祇四百一十四萬。關上歲解。只得二百四十萬。其在天津。又未便得一百七十萬。則此不可知之數。在民當問之民。而民無可問也。不在民當問之有司。誰肯問也。不在民。不在有司。當問之計部。而計部旣使不完之遼餉。得寬於考成。復使已到之遼餉。散給於別鎮。於非遼處。作情面。反於遼。做風裁。議請議汰不少。恕此其名實相拗。政宜據經以爭之。詎意不强爲爭。反阿爲奉耶。或謂減兵之旨。不盡於省餉。知當事者之意。在進。故以此掣之。此亦中朝意亦誤矣。進以求敵。守以禦敵。其於以當敵均也。主於不敢當敵。何以爲守。敵不來。我可勿求。敵來奈何。諱一進字。是倡一避字。避者逃也。逃有底止耶。况三軍之氣。宜長不宜滅。長則戰有餘。滅則守不足。搖首吐舌。相戒以敵之不可嚮邇。卽有壯夫。氣立盡矣。况謂之守。必可以守。而後可。彼以不敢復遼東之意。而遂云守山海。夫無遼東。則山海不可守。非大甯。東勝可比。其說已具於

當事者之入告而不進兵。何以復遼土。何邊人之暗於大較也。遼之必宜恢復。非直原有之封疆。不宜委敵。無遼則不能有薊。禍遂迫於京畿也。從來守國。必據險隘。山海關城立於平曠。不得稱險。南北十六里。不得稱隘。而海更可處者。與敵共之也。故先守覺華。漸圖金。蓋皆所以奪海之用。使專屬於我。而未敢宣言。懼生戎心。近乃聞敵之不殺張盤。使修戰艦。誰謂敵無人乎。高議雲臺者。尙欲騃持守關之說。以棄遼乎。故恢復非爲遼。爲內地也。恢復明旨。揭若日月。申飭中外。協力同心。不啻再四。而議論滋煩。擲榆日甚。縱觀肉食之謀。強半婦人之膽。彼既不敢明抗恢復之旨。而又不能自暴其中情之怯。遂巧爲託寄。附於他山。不必明沮恢復。而能使身任恢復之人。日劫制於似愛似助之深文。置辯則非體。而復虞泄機。含容又情事不明。而權遂漸移。其持論大端有二。一曰慎重。一曰簡汰。夫兵凶戰危。當事者身切利害。豈其嘗試。且慎重非執而不變之死法。亦非虛而無據之活套。惟實心任事者。深入於事之中。歛卻日習。躊躇轉熟。朝士身在事外。固無由得其肯綮。卽邊人之無膽者。身若在事中。心實在事外。彼於恢復兩字。已目迎而心拒之。何嘗一日實實著手。見其所慎者。何在。乎。以此持論。不過自居於擔遲不擔錯之著數。予人到底難滿之分量。而恢復自寢耳。簡汰之說。設端更巧。被戎行以嘗有之事。則取信易。爲海內持省餉之名。悚聽更易。且兵旣冗冒。則將兵者當併裁。將旣虛糜。則將將者當併去。和同上下。救過不暇。尙復言恢復乎。故慎重原以進取。簡汰原以振刷。俱武之善經也。而出於今之君子。則慎重非爲進取。意在退怯。簡汰非爲振刷。意在銷兵。而總以巧行其阻恢復之術。夫百計而鼓之進。不能當一言之議退。三年而集此。

衆不能供一日之議銷。不征不戰。去將去兵。無論垂成之緒。驟廢行且。前日之患復作。遼廣潰時。都門之光景。猶能憶否。總之今日身在事外之朝士。以隔壁之猜。而索邊人之情。心在事外之邊人。以一面之詞。而迎朝士之意。索邊人之情者。遂恃邊情以爲朝論。迎朝士之意者。因藉朝論以撼邊情。暗刺明譏。此呼彼應。協心力以搖當事者。而榆關之本色盡掩。此可爲流涕者也。且慎重簡汰。卽不妨從旁論其理。而其事須任當事者自酌之。如持成說以授之曰。某地必不可出。某策必不可行。某兵必不可留。某將必不可。用當事者尙可一日立於將吏之上乎。誰不畏強敵。而使之不敢退。誰好居危疆。而使之不敢去。總奉天子之寵靈。有所以恩之威之者。而人心乃一。又軍中總奉一人之恩威。別無所以分其恩分其威者。而人心乃不得不一。今事之進止。而別有主人之去留。而別有門當事者。又烏能行其令哉。故恢復爲必然之畫。而其要在省議論。議論不省事。權不一慮。宋之禍復中於今也。

答岳石梁書

樞相初任東事。而號翁臺助子。總從國家起見。彼時人疑樞相爲附浙也。以去翁臺者併去師相。轉盼變局。而此時人復疑師相爲附東也。以除彼時人者併除樞相。樞相自笑不東不浙。兩無著脚。爲今爲昔。總成背時。斯言也。翁臺聞之。亦當笑而涕繼之矣。請一覲天顏。而不可得。翁臺遽訝其別有機轂。詎知入春以來。愈出愈奇哉。矧弋尉羅。百倍於翁臺任薊時。新夏稍定。則猶有天耳。一向所患。同室之干戈。助敵自攻。樞相徘徊浩歎。苦之久矣。安得同心如翁臺者。與相周旋耶。東山之出。想不棄舊遊也。

答張孟均書

十年之別。忽接手教。中外矛盾。漸不可長。一句已說透情事。督師公之不得行其志。一年餘矣。而又不得去。政苦維谷。乃以哨將被陷之故。成其去。弟相率歸田矣。感年兄愛我。憐我教我。今幸不辱命矣。所可恨者。河東已有可復之機。而我此番接濟來歸之難民。橫爲同室之人。苦相妬害。舟師違期。陷我哨將。失此機會。因以遂其逐督師公之志。從此恢復兩字。無人出口。此忠臣義士負戟而長歎也。最奇者。上下不問舟師違期之故。只歸罪於哨將之輕進。根深蒂固。一倡羣和。尙有人心哉。弟從此長往。未知得再睹芝眉否。落月屋梁之感。固千里所同也。

與趙明吾書

師相自不趨朝。不佞亦必不回部。點簡書劍。相率歸田耳。三年來事體之曲折。人情之苦樂。何堪回首。今雖從師相歸田。夢魂猶日繞黑水白山。與前部將軍相周旋也。捧讀手札。寸腸欲裂。甯直爲遊子之悲。抑豈爲離人之淚。所手額而祝者。代師相之人。果肯不改師相之臣。與師相之政。使河東終歸版圖。則不佞與師相。雖去猶未去也。前所借駿騎。原擬東征跨之。今附郭官繳上。不佞自此腴肉復生矣。

認真草卷十五

再歸草

同杜武庫乞代題請告呈

爲積病沈綿。懇恩代題事。職等俱於天啓二年八月二十一日。奉旨從台臺抵關。糜餼行間。已踰三載。未效寸籌。而每善病。繼病痰火。芳病泄痢。皆連年舉發。一次劇於一次。至甯遠而繼。幾爲異物。至右屯而芳。幾無生理。昏暈困頓之狀。皆台臺所親見者。不待職等之重述也。至是而職等自傷難再。以驅馳矣。曩當邊事告警之日。食焉不敢避難。遑自揣其無才。今值兵政簡汰之時。引分當自議裁。况復重以有病。無事而食之名。任留遠塞。一息尙存之骨。求歸舊山。伏乞台慈。憫念病苦。俯賜代題。使生入里門。得就醫藥。疏水沒齒。總佩生成。

乞本部代題呈

爲積病難痊。懇乞代題。以保餘生事。竊職繇萬歷四十一年進士。四十三年八月。授戶部山東司主事。十四年八月。丁母憂。四十七年六月。服闋。除授戶部河南司主事。本年七月。以借發金花銀兩。助遼餉。奉旨降一級調外任用。泰昌元年八月。奉旨復職。十月。管新餉庫。天啓元年四月。調兵部職方司。管題覆本章。二年六月。奉旨隨掌部輔臣閱關。七月。復命。八月。奉旨從督師輔臣到關。四年九月。陞本部員外。五年

四月從輔臣於關外積病纏綿。具呈請告。於十月間蒙代題奉聖旨。該部知道。十一月間蒙吏部題覆回部供職。奉聖旨。是理合遵旨赴部。以職非劣。憊蒙先皇帝拔擢廢棄之餘。每念明恩。敢私頂踵。是以扶病從戎。未敢言病。適荷明綸。便期沿途調理。赴部供職。但以蒲柳之軀。馳驅四載。病因積勞而成。氣血兩傷。又因久耽而劇。目今延醫李郁調理未愈。何堪供職。懇乞俯賜代題。生還舊里。倘垂危之病。借此漸瘳。則已往之年。皆屬再造。爲此。

再乞代題呈

爲積病日深。萬難供職。懇乞代題。以延餘生事。竊職因積病沈綿。閣部代題。吏部覆奉欽依。回部供職。隨具呈積病難痊。懇乞代題。覆蒙堂劄行職。遵照欽依事理。赴部供職。奉此。理合遵劄赴部。惟念職稟素弱。職性好強。苟可支持。恥言疾病。而勞從此積。病從此深。及病劇而就醫。已勢重而難返。目今頭暈眼昏。手拘足攣。痰涎壅盛。飲食消減。醫生李郁。謂血氣兩傷。未易補復。非一意調養。恐無生理。職至是。心口相維。難再以馳驅矣。已成廢人。何堪任職。懇乞曲體物情。俯賜代題。使沈疴得以靜養。則餘生或可尙延。爲此。

三乞代題呈

爲積病日深。調理未愈。三懇代題。以保餘生事。竊職先因積病沈綿。閣部代題。吏部覆奉欽依。回部供職。隨以積病難痊。兩懇代題。於本年正月十八日。蒙堂劄行職。遵照先今劄內事理。照舊前來。不妨稍遲時日。俟調理稍愈。即便赴任。奉此。職正在調理間。於本月二十一日。復蒙堂劄。以職新陞武選司郎中。行職。

兼程前來赴任。管理司事。奉此。惟念職仰遵成命。加意調攝。冀旦暮之霍然。卽捧檄而就道。詎意涉月逾時。有增無減。見今手足之拘攣。轉甚。頭目之眩暈益深。痰涎盛而眠食愈損。脾胃弱而泄痢新添。蜿蜒牀褥。徙倚絲人。職至是自憐自歎。不復可馳驅當世之務矣。醫生李郁。謂氣血幾於傷盡。藥餌未易補復。非脫離事務。一意靜攝。無復可望。此職同鄉同官王主事。登三所親見者。竊念職四年戎馬。原非避難之人。百病侵尋。豈作無情之語。藥裏日以棲身。何堪問職掌。蹣跚不能出戶。何以趨朝參。况武選稱繁劇之司。事旣非病驅所能任。而郎中非虛懸之缺。病更因曠職而倍增。此情此事。想大智之所必察。至仁之所必憐也。懇乞台臺憫念。俯賜代題。使職得一意調養。則身以去官而稱輕。病以安養而或愈。殘喘可延。皆出再造。

爲杜氏諸生送王邑侯之南儀部序

吏何以循。使人安居樂業之外。無循也。人各有業。而非上之人。覆露於其間。則不能樂。天下農無不勤。惟士多媮。農之業。得無所以擾之。卽不勝樂。而士之業。則賴有以振之。然後其精神警聳。日新而月異。中訥王公。令范陽。農若不知有吏。士則各幸有師。居恆進諸生而課之。指授肯綮。無難以袖珠示人。且命諸生之私課。得以不時進。余從里中見杜生數輩。往往持社草謁公。未嘗逢執事之不閒也。夫官忙人也。令忙官也。而范陽又稱忙地。公何自得閒。與諸生講蒙哉。蓋世所謂忙。予旣已知之矣。責贖緩。則前件不能輒銷。嚴火耗。則初限不能輒完。鍛鍊敲扑。往復聯絡。大要一日事。十日不了。一月事。經歲不了。卽樂此不疲。

而其忙已甚。有時循故牒課士。語未終而意已移。諸生安所得聞而問業焉。至公而見訟庭之嘗閒也。且以講業爲消閒爾。雖然。天下事以閒忙分雅俗。而偷食視蔭。非所語閒也。天下既經庸人之擾。不能安無事之常久矣。今繇有事以還無事。一切忙人。何能辦此。孔門所稱居敬當簡。當其閒。有忙之用。卽今吾黨小子。遞以其業求正於鳴琴之座。彼悠悠世眼。未嘗不竊笑。以爲此閒事。無關於仕路緩急之數。而范陽百里。頓還無事之天下。太平無象。借閒事以點綴之。則閒不當作閒觀也。且諸生之業進者。不獨杜氏子。卽杜氏子。亦不必盡以文名。而公之願盼。覺與衆異。扶植護惜。每在言外。則公於論文之外。復爲論行。且因其子弟及其父兄。默以爲善之利。風示末俗。此尤世俗之所笑。以爲閒事。而解事者。斷不作閒觀也。如世之論閒忙。曹郎閒於縣令。儀曹閒於他曹。南曹又閒於北曹。公繇范陽令擢南儀曹。殆避忙之忙。而就閒之閒歟。而范陽實未能使公忙。何必就南儀曹覓閒也。且公於忙地作閒事。知音者。又不以閒事作閒觀。安見南儀曹之閒於范陽令乎。江左風流。馬曹一語。晉遂陸沈。乃後有述焉者。曲爲之說曰。此有心人熱之極而成冷。誠如此說。冷熱將截然二境哉。世惟於人之熱處冷。乃能於人之冷處熱。卽范陽四載。每見公於冷處著情。而提四境之生氣者。何非此冷然之情也。南陽龍臥。曾以淡泊甯靜。自繪其閒冷之趣。而茅廬中安所得益州圖。披以示人。誰謂抱膝吟嘯。一刻忘天下事哉。公南矣。雨花臺。燕子磯。皆吟嘯之所。爲冷爲熱。誰辨之者。先哲有云。廊廟江湖俱有事。今人忙處古人閒。江湖且有事。矧南儀曹乎。故知言者。不必諱言忙。不必飾言閒。古人非盡不忙。特不忙今之所忙耳。二三子試以此旨當問業之一則。公以

爲然否。

張蓋菴武雋序

余自關外歸。樂問武事。蓋行間三載。見慣成習。卽田家決拾服藝。事力不比幕下。而幕下亦自有一種游氣可厭。具眼者每以帶田家氣爲前茅。因此法相田間人。嘗謂張蓋菴可將也。而怪其曾不應武試。強之入闈。旋職客自上谷來。談闈中事。蓋菴步射爲當場冠。當事者呼至前。賞歎再四。蓋菴不一謝。且許爲推轂。而亦不對。愛莫爲助者。詫其遇合之奇。而恨其不就。當下機緣。出一語以自託。落落穆穆。豈不冷推轂者之心。風簷射策。重厚少文者。能再得志歟。余曰。否。此蓋菴之所以可將也。當事者而非具眼。天下事誠不可知。如其具眼。則推轂之意。且不決於擅場之巧力。而決於不對之氣骨。蓋兵家事神奇變化。卽十三篇有所不能盡。求其實地。莫切近於跼得住之一言。人之所以跼不住者。非其力不敵。氣先奪耳。而易奪之氣。豈臨敵始見哉。當場較藝。馬如飛電。箭如霹靂。若有踏破賀蘭之意。挾策而前。誓日而語。恨不急得一當。洒此熱血。然站不住者。偏是此輩。何也。當場之決拾。戰場原不相干。在口之忠義。捫心原不相照。其精神全用於躁進。且無隙而相窺。豈有因而不至。自薦比處囊之錐。乞憐效依人之鳥。至使形容將套者。謂鼻有口。腰無骨。嗚呼。游氣如是。而望其站得住。可乎。若所謂田家氣。則神無越思。口無卮語。面嘗帶耐勞之色。而對人則木強。聞語則羞澀。蓋厚地之氣。原自凝重。田家人每偏得之。不爲游氣所蝕。則爲氣骨。汲長孺自謂賁。育莫能奪。岳鵬舉人謂山嶽不可撼。此物此志也。當事者嘉歎蓋菴。初亦爲其

巧力及嘉歎再四而不謝。許爲推轂而不对。有不洒然異之者。蓋菴亦自率其田家氣。而真將軍之氣骨。已露一斑。誰忍使重厚少文者以射策詘也。如謂落落穆穆。足冷推轂之心。當事者之前。豈少一請處囊中人哉。余既答客。預書之以爲券。未幾。客復來曰。有是哉。此券之善測人意也。蓋菴既得志於鷹揚矣。請持此以賀。

與王中訥書

不肖某。樸遯非材。從軍四載。今始得以支離之骨。歸息邱園。孰非台庇之所蔭及也。仰負主恩。雖未卽予告。已再呈敝堂翁。求爲代題。堅此初服。以遂餘年耳。耿企台光。亟思趨叩。但長征初返。病體難支。且旣以病乞身。一路歸來。并未敢束衣冠。以見縉紳長者。容賤體稍平。自當九頓台墀之下。先肅寸楫。代布伏冀。鑑涵。

答蔡覺我書

四載征夫。一身百病。歸骨家山。乃不爲當世所憐。部筭嚴催。不一而足。於三辭牘中。已附決絕之語。此番或可免乎。旣堅以病辭。敝堂翁遂不敢謁縣父母。卽翹企龍門。亟欲拜下風。抒積思。而遂巡未敢。此台臺之所必察也。溫語遙吹。病骨欲起。佳品先嘗。悴色欲舒。倘仗洪庇。賤體稍復於休息之餘。當從山水間奉杖履。代奚奴佩錦囊也。

與范夢章書

客歲在幕府接手教卽以呈督師相公諷誦再四益增鄭重其所爲不附板章者已與使者面商之想能達也未逾月而年兄已出春明相公持報示弟不言而笑已復黯然弟以病軀而從戎馬戎馬不能戾弟竟以病戾頃已借庇得作閒人扶病江干鷗鳥可玩人間事總不到心頭而自省猶有一種事舉世所不照管者猶時來往於胸中不能斷滅或宿因耶客有余完天者兩月來兩到柴門昨復持其密友手書求謁年兄其密友吾輩同榜又年兄同官其手字弟熟識之年兄旣與同官一見能辨也渠不敢列己名又不敢書尊號微意可想至於其事不待弟言未知肝膽向誰是令人却憶平原君

答范懷洙書

曩於東歸途次見榮轉冬官之報人所以酬勞臣天所以昌有德互相發明弟之爲快不啻身當之也忽接遠翰以賤病見存知言哉焉得不病且不病何以爲弟下一轉語弟之真面目畢呈矣不意當是時猶有以非真擬弟者勞親丈爲我寫生也惟是病能苦弟而見苦不苦其苦自減辦一副耐病心腸頗能苦中覓甜絕貴遊書伴親密友藥裏詩囊迭爲進退結成工課近以無官果覺身輕且當世之務留得親丈輩任之儘可放弟田間以恤其倦遊之私三徑之哦且不敢勞親丈作對也况去留何常只要各成章法親丈新膺簡任豈不知此非講三徑對哦時或健羨隱士衫幽人筆而有妬弟心故云云耳

答孫相公書

李生來披示鼎札春溫之氣病骨欲蘇詢知老師起居佳勝手額稱慶每念老師素原無病病從塞下得

既脫塞下。自爾霍然。門生前原。就病往後。復帶病歸。只好強之性。恥爲病困。略可支撐。卽作據鞍狀。然亦時復困憊。近稍知懲矣。惟是宮牆之戀。寤寐恆切。誠如師命。西山之人。有時尙能僂僂爲奚童伴。想比十三山之往。大自從容也。三年十月十三日之時。爲某詠。而未以示某。業製錦囊以候。老師諸稿。鑄完多時。乞每種賜二部。蓋欲一置案頭。一藏櫝中。以老師提誨無已。故敢併請。恭譯題楹十四字。不減半部論語。某何人斯。敢爲優孟。然不敢不拜賜矣。

答畢冲陽書

廢病之人。百念俱銷。自謂清江一曲。隔斷紅塵。而應門剝啄。云從塞外來。則不覺動舊遊之感。又是台臺使。尤觸故人之懷。手捧八行。面談千里。關外城守堅完。自足憑恃。爲守爲屯。漸推漸廣。台臺所稱照常法。做去。卽是勝著。大要敵與我各有短長。匿我之短。而用其長。避敵之長。而角其短。所謂知己知彼。已立於不敗之地也。卽致敵一節。亦看後著何如。我有所以持其後。則多方以誤之。兵原無定形也。特此事我爲感。而彼爲應。感者須料其如何應。以爲下手。又須拚料著料不著兩路。尤須多備料不著一路。方可以誤敵。而不爲敵所誤。今幸台臺在行間。必與當事者算定前後著。以貽宗社之安。某與田夫野老共樂太平也。

與范夢章書

弟是時方爲功服攪腸。大減飲食。一二執友。故舉平生得意人相詢。冀以救脾。因拈戒詩文求靈夢一聯。

政在嘆賞而蒼頭傳吳橋使至帶江南雁帛在坐灑然動色謂古稱神交原有是理及接素札乃大驚痛因復自痛仁兄與弟俱作無母兒哉弟病臥江干未得以時聞起居有失吊慰反辱仁兄於是時念我病饋我藥也天地間同調者相憐同病者亦相憐仰念仁兄之性何以堪此然此時不特意猛提禮字作主則至性將爲滅性弟曩害此病只爲提醒不蚤不猛遂成年年抱病之人漸弱漸衰略有感觸卽心跳氣喘四肢無力再不能耐勞煩入思索迄今常以貽家君之憂每追悔恨而已無及今特爲仁兄誦之願仁兄自愛以錫天下福者爲報劬勞恩且不以當堂變者貽椿庭憂也盱衡海內有幾人哉不腆以伐絮酒聊伸猶子之誼惟仁兄叱名以告几筵亮不以弗躬弗親而吐之也

答賈孔瀾書

弟原索竹瀝等物而遂致分清俸卽不安不敢不拜以爲酬醫之具每念萬死一生之餘息得棲幽僻而復躬逢聖主大地回春從此漁歌起興樵夢不驚受享清福爲第一義而手教乃過爲期待是妬我清福而欲奪之弟自揣骨法僉父非達官之相再照世法蒲輪無自至之理政好借不必至之實理以盜不欲仕之虛名老親翁愛我何忍發弟之覆大札所稱臬、夔、稷、契定當有人以弟觀之夫子自道弟惟誦太平公等在之語以自娛耳新天子舉動陶唐氏十七歲時恐未逮此處魏猶人意及處徐則非意所及而特問不拜生祠之名夫豈不知而問欲表風節以易海內故爲此跌宕文法非時賢所能起予也樸公有開府消息次公於此時鵬奮天道如此善人猶可爲也

答滿憐丹書

吾人生天地間。第一等願。要報國家。而報國家。又全在安危存亡之際。台兄前守甯遠。憑城以戰。挫敵人累勝之威。後救錦州。身先士卒。矢石相薄。折敵人長驅之勢。台兄之功在社稷。其自高皇帝而下。實式臨之。固不枉孫師相推轂一場。而不佞亦得從交遊之末。借光不淺。卽賞未酬功。而此段功勞。自在天地。退之而愈揚。雖善妬者。喙長三尺。祇足爲大英雄洗發精神耳。

答姚孟長書

離合之情。無能鼓山陰棹。存亡之感。何堪聞山陽笛。以仁兄知我之深。而猶爲蓼州事。過執朱完夫語。介介至此乎。前者事在急中。只得借貸。而弟以身任。原無契文。朱公南還。曾自京強遺一契。弟已卽時火之。後有吳樞使寄朱公書來。而按其轉寄之繇。有來無往。竟無繇附報章。以布鄙衷。致長者之介介。弟之罪也。瑩瑩孤寡。旣驚覆巢。復苦立壁。當是時。而介介前說。是江南人人節俠。而河北無一人義士。置弟姓名於蘭譜外也。自今以後。願勿再提。只以此情告於蓼洲兄。几前以百五十金當弟千里之束芻。則仁兄之愛弟者至矣。躬逢真堯舜。乾坤再闢。人相慰勞。精神相對。各天無異同堂。重泉亦如復起。歌誦聖德。仁兄當亦琳瑯。而救時手段。想仁兄中夜起坐。技癢難禁也。有真堯舜。自有真皋夔。予日望之。束髮聞張異度名。未得從之游。兒麟乃有緣。倘借鴻庇。從賢豪長者。乘風雲之會。提挈有人。可免墮落。無負仁兄期待爾。

別後兩從吳橋使讀仁兄所寄。而其人。有來無往。不佞無絲附報章。此番乃得從張異度之手。以佈積悃。夫前爲蓼洲年兄貸事。不佞原以身任之。仁兄自京遺來之券。不佞已卽時火之。周氏諸孤。旣驚覆巢。復苦立壁。豈割饗殮。以償前事。必拒不佞於蘭籍外。不使得效一毛於緩急之數哉。仁兄過執。不必然之小信。而未暇爲不佞地。今以後願勿再提。只以弟情告於蓼洲兄。几前以百五十金當不佞千里之束芻。則仁兄之相諒相愛者至矣。孟長兄有字。亦以此語爲報。仁兄欲自爲信。當容不佞使勉爲義。不佞得自附於義。而仁兄之信自在。積悃萬縷。未遑詳布。先以緊關之情奉復。

與耿樸公書

兒麟赴試。曾作字併詩扇。令其親投揖客。想旣徹視。昨范舍親有使寄來。老哥手教聯翩。且范金爲器。以揖客垂宇宙之客。挈鹿門隱之號。鐫行落。疑佐北海樽也。大名自經聖問。而人心之夜氣乍回。國家之元氣復甦。此是聖主轉旋乾坤手段。蓋向來人心盡死。遂令國脈難言。而重陰積蔽之餘。非得聖主大作用。以爲宣提。何以挽陽和於一綫乎。然宣提之權。賴聖主鼓鬯之用。賴廷臣而順風之呼。則不屬悠悠泛泛之人。而專有所屬。當是時。老哥試思順風之呼。當屬誰人。老哥卽不隨人。人不得不隨老哥。卽彼謬張其不隨老哥之形。老哥當自保不隨人之節。而事勢所底。老哥全操其勝。非角一人之勝也。爲國家之元氣所賴。而完聖主問揖客姓名一段心也。至於運用之妙。自如阿馨所言。然此在老哥。自有深意。無待淺人之喋喋。特鄙懷有所不能已。故信筆至此。

與王翼聖書

李道長有疏叅滿桂馬世龍旨下部而馬有勘處二字。夫當壬戌春夏何等風鶴。孫相公拔馬滿於稠人之中。授以重任。經營關外。恢復四百餘里。使山海在重關之內。不以敵遺君父之憂。有人心者所共知。卽不敍其功亦已矣。而復誣以罪耶。至於馬帥七萬金認客。魏之談更屬可笑。金至七萬。不爲少矣。是必於軍中取之。而軍中錢糧出入。不經馬帥之手。監軍與府廳各有銷算。孫相公已總爲奏報。卽後先求多於關門者。搜索備至。不聞馬帥以賊迹劾。則此七萬金何從來耶。且人情費錢原爲做官。馬帥費七萬認客。魏便當做官。奈何於逆璫極盛時。席未煖而去官耶。此事理之最易明者也。一去二年。無人提起。金多者固如是乎。李疏語意從喻安性。劉永基來。蓋喻堅持關外不可做之說。以撓孫相公恢復之意。而劉其心腹也。裏勾外連。大事以債。因以難馬帥者。難孫相公。從前踪跡。久著耳目。而李道長與劉稱厚交。卽其疏薦。喻意自可見。今日之疏。亦不徒難馬帥。意亦在孫相公也。夫當國勢岌岌。人無固志之時。有人出萬死不顧一生之計。以一身塞敵騎之衝。宗社獲安。率土受賜。及事略定。而各恣事外之口。橫坐無影之職。爲宵人快報復之私。一唱羣和。幾於吠聲。此英雄所以負戟而長嘆也。然一偏之見。一面之詞。旣不能使之不起。所以持公論而服人心。洗前冤以責後效。全在中樞之主持。前日趙率教被督師重劾。竟賴部覆得免。則今日之事。在老親丈必有善爲之解者。非從馬帥起見。亦非止從孫相公起見。直從國家起見耳。馬帥在數千里外。此時政未知。弟亦非欲馬帥知。卽老親丈如雪肝腸。如雲意氣。施恩於不報之地。而古人

有云更莫留形跡何曾廢古今則不可泯滅者亦自在耳

答蔡覺我書

清江一曲。妄摹桃源。何事除書尾漁人而至。自訝無繇。不知所以應之者。翁臺乃盛爲揚厲。從臾其行。豈非獨欲爲林下一人。故迫使閒雲出岫耶。蹒跚自笑。原非貴人骨相。且晚節之難。素所切心。每見再出多成蛇足者。此不肖之所以聞新命而隕越。讀華札而沉吟也。五品原無辭例。擬以病求寬限。或無不可乎。翁臺愛我。披赤指示。是祝曩者拙聯請政。乃有緣入龍爪書。作鴻冥判耶。

答孫相公書

門生賤體比前略愈。而蹒跚之步。以點朝班。尙覺其難。家君藉庇。眠食漸復。憂旱得雨。色動田疇。遂忘牀頭有久壓之部檄也。然繼視此尙不足當雞肋。當是時果有以是法相尼者。適相成爾。止生詮次。老師督師大略已成帙。然老師自己事。惟自己心。自己口。自己手。乃無不了了。一假門下士。便有所未盡。匪獨耳目多所遺忘。深心遠志。原非淺衷所能盡測。須老師盡情筆削。庶可成不朽之業。夫兵事當爲後法。非關有激而云也。老師豈以爲不然。

寄張石林書

恭喜老年臺開府此地。非爲老年臺喜。爲此地喜。更爲此時之此地喜。六十年不戰不爭之地。忽發其難。於一朝。作二十分才。二十分膽。烏足勝其任而愉快。主上神聖。天地祖宗。齊來呵護。默爲啓牖。誰令先於

此地預備斯人大難一發不需才於遠地。應時措手。如兔起鶻落。斯亦奇矣。讀召對錄。聖上雄姿英發。掩映二祖。中興大業。拭目可待。老年臺所以酬主知者。不以堅靠一王刺麻爲謀主。謄一諭帖爲嚇蠻書。錦囊祕策。可略拈梗概。以示故人乎。薛同知一鷗。同道同筆硯。且年家。今幸且在老年臺宇下。其材品已經道眼。無待曹邱。獨念其偃蹇一官。幾成雞肋。乃忽以此地變款市爲戰場。得依大英雄。以白面習軍旅也。軍中無苦樂。但問所從誰。當是時。薛君樂哉。想老年臺磨墨。楯鼻。或進薛而詠拔劍斫地歌。莫哀。我能拔爾抑塞磊落之奇材乎。滿帥到日。必當尊意。其人沈雄椎魯。大類絳侯。高陽相公所不次拔之者。素知撫事。而以戰功聞。然於遼未竟其用。弟每嘆朴直。懇到如滿帥。而得驕悍名。老年臺試思鼻有口。腰無骨之將。能辦殺敵否。夫以魏鄭公以懋。而文皇偏見爲嫵媚。年臺大手。自能通此意於用將。國家徼福不淺矣。

與孫相公書

太倉之謠。久假不歸。長山之辣。愈出愈奇。而所以至此者。老師當事任而不自斂。遂使天下真以爲無功。被誣謗而不自明。遂使天下真以爲有罪。市虎三至。能不投杼乎。夫老師督師事業。總用金錢。而金錢百五十萬。有功則爲功。無功卽爲罪。原不能做無功無罪之人。老師從來只嫌於自斂。三年辛苦。不曾有幾種書冊。傳布縉紳間。漸丟漸冷。久而若無。遂使有賴功者人賴矣。猶不自言。則賴者非賴。功旣被人賴。則罪卽自我當。其有今日。勢所必至。老師初豈見不及此。特以爲事實。在邊疆。必不容瀾。賴天理在人心。必不盡漸滅。而今乃有出於常情常理之外者。老師想亦悔其言之不早矣。馮異不伐。充國言功。各有攸

當也。彼其之子。既不遺餘力。老師今豈猶有所諱而不盡言耶。當是時。仇我者固多。好我者亦有。只爲老師不自言。從前拮据。未著人耳目。遂使仇我者有所賴。以肆其毒。好我者無所憑。以執其口。此事之最易明者也。昨見王道長相說一疏。論閣臣分派票擬之非。謂軍國大事。宜專責首輔擔當。已奉諭旨。此物極必返之機。然老師亦必預有安排。不落齊東之手。更令臺省中同心者協應之。方得大轡指歸耳。衷情憤鬱。語無倫次。惟老師原亮。

答滿懷丹書

兄真廉真勇。真正英雄。特生來不曾帶軟媚骨耳。張石林自負英雄。豈不能識英雄。而待不肖先容哉。插虜卽橫。素刼於兄之威名。必不敢大逞。然聞大同鎮士馬不及遼東之半。且遭大侵。荷戈者枵腹。則事勢極難。政煩兄苦心耳。惟加餐自愛。

答張蓬元書

前聞台臺以少宰起。馳告韋弁。大家手額。爲世道稱慶。非從舊知起見。不謂此情。遂達鈞聽。蒙翰教先加。併得讀答謝稿。一字一拊心。一讀一擊節。因嘆刼數之力。足以驅人心。而人心之力。還足以傲刼數。每見刼數盡處。必有真正豪傑。瀕危而不殆。以爲重開草昧之資。則人心莫非天意。台臺之有今日。蓋天所留也。至於某之不才。加以善病。謬蒙新命。苦無辭例。而欲趨朝。又病未能也。且台翰所稱救時一人。政爲白眼賴功者所構。而波及其同事之人。不獨若馬若茅。見當對簿。卽賤名亦聞屢在物色。以有解之者而暫

止不知解者爲誰。所稱愛我而非知我。蓋迂僻之性。何嘗夢遶春明。倘終見押。實獲我心。台臺知我。豈以爲不然。

寄王中訥書

數千里隔。苦無從聞近况。忽有魏仲子自都寄尊札來。目迎之而神躍。手開之而色飛。偏示友人。若親奉芝眉而聆玉屑也。讀罷復爲黯然。使邇來當事者。有一從風塵外具眼。從國家事留心。豈其當是時。而猶淹大賢於留都。徒令如雪肝腸。如雲意氣。無所事事。而寄傲於雨花臺畔耶。此自有任其責者。於老父母無與也。而不佞下一轉語曰。此自老父母之隨時隨處。總以見品。而與彼無與也。何也。彼一時也。闖人竊柄。做官者向北。做品者向南。品猶易見。此一時也。聖主開天。無論做官做品。一概向北。而老父母猶然。不北則老父母之品。非今日一概之品。想慊心處。不以告人。或料舊遊之地。有一僮父。能相賞於千里外耳。卽此僮父。捧檄亦旣經年。而栖遲江干。若有所思。有勸駕者。輒以他辭對。亦料知音者在雨花臺畔也。舍親劉啓我之往。附此道意。劉文武才也。一經道眼。必收藥籠中。魏二哥血疏。聖主動容。廓園有子。子敬有弟。乾坤不毀。特此等人。此等事耳。可無詩歌。以翼風雅。惟老父母鼓而不佞舞之。

認真草卷十六

奉常草

陳治體疏代

爲因事感時。陳治體以杜亂萌事。竊惟論治者貴識體。體也者。尙簡不尙煩。煩則褻而生擾。治明不治幽。幽則隱而售奸。臣新忝諫垣。叨巡視皇城之役。見聲寃者之接踵也。聲徹仗下。狀出懷中。是何體哉。我太祖之神聖。豈不欲使萬方情狀。盡入耳目。而律禁越訴。誠以治天下。只論其大者。大體不褻。民志自定。雖有一二事之失平。不害爲治。大體既失。而民易其上。雖有一二事之得平。無救於亂。故體也者。甯直儲神以圖大。實爲章分以鎮囂。願皇上重持之也。然而此風。初未經有。忽起於近日。豈無自哉。小人善意。彼見皇上時憑單詞。以格通國之議。而測皇上之所喜也。喜則信訐爲直。又見皇上偶主先入。以爲一成之案。而測皇上之所護也。護則有錯不認。遂爭以投機之語。求據上游。而豈知皇上之原無成心哉。天下者。皇上之天下也。是非者。天下之是非也。皇上原無成心。而時有其迹。被糾者身名各當自愛。共謂無可留之理。而每藉溫旨以弛裝。拜疏者可否必有所歸。自謂無不下之理。而間置苦口於高閣。使非暗有所據。何至堅有所持。至於道路傳聞。或進密疏。人心疑忖。能遽釋乎。大要英明之主。厭雷同而伸獨是。然獨是不從人之多寡論。而從世之清濁論。公道混淆之世。小人滿朝。而有孤行一意者。此獨是也。魏崔之日是也。

公道大明之世。君子滿朝。而有自行一路者。此非獨是也。獨非也。今日是也。論是於今日。政不在獨。則聽言於今日。將焉用密。况密之爲言。自何途以進哉。宋儒眞德秀以進賢退不肖。責宰執臺諫。而歸本於人主。大公至正之心。夫身爲共主。豈甘明入偏私。顯拂輿情。概繇密寄耳目。人主耳目必有所寄。所寄者顯。是爲治明。明則宰執可信。臺諫可信。卽間有敗羣。必遭衆棄。而進賢去佞。無拔山轉石之難。所寄者密。是爲治幽。幽則宰執不可信。臺諫不可信。惟近習可信。卽間有小忠。必售大欺。而神靈威武。供煬竈借叢之用。臣不暇稽遠代。只取喻近年盜竊國命之魏璫。非以東廠用事耶。朝廷宰執臺諫。孰非心膂股肱。何於奏牘之外。別有日開之事件哉。卽設廠初意。亦察閭閻之動靜。非關廷臣之品題。無奈奸人巧設機設。以用廠臣。而其禍遂不可救。聖明在御。萬不至此。而事旣失體。必至售奸。願皇上慎防之也。夫越訴。律所亟禁也。而今聲冤何以異。竊訪。尤律所重誅也。而今密奏何以異。二者總傷治體。而治幽之禍。不止滋煩。或謂道路卽有傳聞。微茫無可質對。訟言於庭。且被妄言之名。然天下事固有情可得於傳聞。而狀不可明指。人臣處此。與其避忌不發。貽養奸之禍於天下。不若先爲點破。任妄言之禍於一身。何也。造端於密者。喜暗而畏明。一經點破。心不無驚。謀不無阻。則一人被妄言之罪。而使朝廷銷暗竊之奸。固甘之若飴也。臣義激憂切。言無避忌。伏乞皇上勿好小察。務持大體。永塞告密之門。以杜暗竊之漸。天下幸甚。臣愚幸甚。

爲太倉釐弊。法當尋根。懇乞聖明。立止報羨。以便兌支事。臣頃在庫言庫。謂收放之法。莫善於兌支。非獨爲卽收爲放。簡易直截也。錢糧一經出入。便有難白之心跡。惟兌支則不求白而自白。然從前筭鑰固多賢豪。豈其智不出此。特礙於報羨耳。報羨起於近年。卽滿差不過二萬。而就事論理。羨何自出哉。入不重。出不輕。能有羨乎。旣使報羨。是明使重入而輕出也。據其初意。豈不謂入卽略重。解官挪敢稱多。出卽略經。委官挪敢嫌少。積少成多。於國亦有利焉。然出入之際。惟一無輕重則已。旣有輕重。何所限制。且報羨是死數。積羨是活法。法而活用。賢者之所嘔心。以冀少裨於國。不肖之所借手。以圖厚利於己者也。不獨筭庫者之借爲利也。利之所在。衆目所射。誰肯讓其獨肥。餽遺犒賞。陋規種種。誰非爲太倉有羨哉。筭庫者亦何樂身受不潔之名。而供衆人瓜分之實。忍氣耐心。孰非爲太倉積羨哉。而積羨起於報羨。則羨之一言。貪夫之所借手。卽陋規之所託根也。今人誰不知陋規之爲陋哉。以筭庫一人之陋。而起衆人之陋。然其實以朝廷索羨之陋。而起筭庫之陋。明言入不重而實重。明言出不輕而實輕。心口相抵。面目強施。以此爲國家積羨。已非公平正大之體。以此爲貓鼠偕眠。遂成極重不返之勢。朝廷所得。能有幾何。而使到庫之金。爲在原之兔哉。故太倉陋規。爲有志者之所羞。而太倉報羨。爲有志者之所苦。報羨之令不更。則兌支無可行之理。爲國者旣使人有不公之出入。而望其有易白之心跡。勢必不能。筭庫者旣有不易白之心跡。而望其有不隨俗之作用。勢又不能。監督臣馮世熙。受事方新。飲冰自喜。欲舉從前陋習。一舉掃除。以副皇上振刷至意。而報羨不止。則出入終不清楚。何繇使兩袖清風。消眈眈者之責望哉。使私者

每起因公利國者最忌見小。懇乞聖明察弊有根因。利有大小。勅令計臣罷除報羨。則太倉從此一清。所得甯止二萬也。國計幸甚。庫規幸甚。

告病疏

謹奏患病實深。懇恩放歸。以便調理。以免曠官事。臣以散材。誤蒙聖恩。起自廢籍。濫列清秩。誓捐頂踵。以圖報稱於萬一。詎意葵藿之誠。雖篤。蒲柳之質。易衰。舊有積痰。每爲舉發。至今春而遂劇。頭目眩暈。手足拘急。且不能趨朝參。又何遑問職業。惟是時當戒嚴。恥言請告。偃臥私寓。涉月逾時。臣同鄉同官所共見者。夫當戒嚴之時。無病而謬言病。謂之避難。固非忠臣之所以事君。嫌避難之跡。有病而不言病。謂之貪榮。亦非志士之所以自處。頃見諸臣中有以真病請告者。俱蒙皇上允放。則疾病人所時有。聖明固曲體之矣。臣之立身。頗有本末。素不避難。亦不貪榮。謹以真病實情。自列於君父之前。伏乞聖明俯允回籍。以便調理。倘得靜依藥裹。未棄餘生。當隨山夫野老。共歌聖化也。臣無任激切待命之至。

再告病疏

爲病久不愈。再懇聖恩。俯允回籍。以便調理事。該臣前疏。爲患病實深。懇恩放歸。以便調理。以免曠官事。奉聖旨。鹿善繼素著清勤。起用未久。何得輒以病請。著卽出供職。不准辭。該部知道。欽此。欽遵。臣不勝感激。不勝惶悚。竊念凡生聖世。孰不願依日月之光。而臣自廢籍。起列清秩。凡受主恩。孰不思效犬馬之報。而臣以末品。謬承溫綸。病苟可調。何敢再請。詎意盼愈日急。奏効轉遲。雖回餘生於垂危之後。幸視息之

猶存。而治己病於沈痾之餘。非刻期之可起。病中苦狀。未敢褻陳。總之頭目之眩暈。猶前手足之拘急。未減。卽聖明不欲廢臣。冀收溲渤之用。而臣衛生無術。自成廢人矣。且苦久病不能任官。復念曠官還能增病。蓋自夏初奉旨。入秋不愈。卽擬再請。而顧戀深恩。幾幸旦暮之愈。荏苒至今。病未全瘳。祇成曠職。身猶半廢。徒重負恩。每一念至。無可自容。伏乞聖恩。察臣病苦實情。准臣回籍調理。身旣去官。病或脫體。倘餘生之邇遂。總聖德之昭蘇。臣無任激切待命之至。

請謚揭

爲勁直孤忠。幽光未闡。懇賜公評。以彰大典。以維世風事。職祖久徵。繇萬歷庚辰科進士。初任河南息縣知縣。丁內艱。服闋。補山西襄垣縣知縣。聘爲本省同考試官。秩滿。擢陝西道監察御史。丁外艱。服闋。補江西道。巡按蘇松等處。差滿。回掌道事。以直言忤神宗皇帝意。謫澤州判。家食十二年。卒。熹宗皇帝登極。追旌諫謫諸臣。奉詔贈光祿寺少卿。其直節在朝廷。政譽在去思。懿行在鄉評。且生蒙神祖優容。沒蒙熹宗褒贈。職何敢一字自諛其先。別有希冀。惟易名大典。聖政方新。而前徽闇沒。弗徼鴻恩。職所爲撫心靡甯也。伏念職祖儀質端凝。風性峻潔。平生言笑不苟。自爲諸生。隱然有公輔之器。令息僅六月。時值均田之令。部使者屬各署三壤。職祖憐息田之瘠。盡以下報。部使者批駁至四五。至面加譴讓。職祖歎曰。是紓民乃蹙民乎。持初議益堅。以得無加賦。然不敢枉要民譽。息田故額二萬八千頃。以履畝占隱畢出。溢四千餘頃。則盡以見賦通攤之。而田乃大均。其令襄垣。值荒旱。凡賑貸煮粥。皆躬爲親督。不以委胥吏。祁寒作

皮袴衣之。民皆爲感泣。襄故瘠。又連歲祲。民多流徙。令不時報。則以逋賦責存者。職祖爲按籍除懸額七。百戶。吏白損戶爲令殿。職祖曰。人以僞增。我以實減。何不可。居民蘇而流亡爲之復業。至以惠利便民爲績。以平賦息訟爲本務。及加意於興學廣教。則兩邑之政如一。而拔息士。則首黃職方杰等。拔襄士。則首王侍御基洪。王稽勳雲龍等。分校省士。則首蒲州大學士韓公等。士論雅以人倫藻鑑歸之。息人以均田釐賦諸惠政。爲樹碑頌其事。而襄垣人爲立祠尸祝。皆去後不及知。卽知亦不能諭止之者。初入臺班。首言民生凋敝。繇守令不職。而吏治無所風勵。則以撫按舉案失實。俾藩臬之不類。得參其間。請申飭吏部。以釐其敝。會歲旱。詔百官修省。上言省聖躬。禁酷吏。恤民隱三事。上嘉納之。時朝鮮創倭。有經略使被劾還籍。駐都城外。以倭圖倭器進者。職祖疏斥其選。悞觀望。宜投四夷以禦魍魎。乃倉皇去。尋奉命按蘇。松等郡。條議息刁訟以安民生。慎讞獄以重民命。禁火化以厚民俗。凡十六事。下諸屬督行之。而躬以廉重自將。去奢泰。杜請謁。三吳華競之習。幾爲之變。又疏言。吳地瀕江海。太倉有兵。使海上可無虞。而劇盜出沒。鹽徒充斥。沿江重地。宜莫如江陰。請以督糧水利一道駐蘇者。移劄江陰。有旨報可。今著爲令。諸所爲地方深計類是。以至霖雨災。則有賜寬恤以培國本。疏訊迫餉缺。則有念重地。恤民艱。消隱患。疏地震。則有目擊民艱。乞止逋負。疏袍價缺少。則有挪借錢糧。不忍加派。疏前後凡數十上。皆軍國民生大計。方是時。上以司馬曹軍政事。移怒南北臺省。斥五十餘人。馬侍御經綸以爲言。鑄職爲民。聖怒方不可測。仍嚴諭以閉來者。職祖適還朝。謂是不言無可言者。乃上疏申救。大略謂考察不當。斥及兵科足矣。并各科斥

之又并各掌道御史斥之何爲者也。謂其不言間多敢言者。謂其目擊時事不言又多奉差在外者。皇上以不言者爲罪之名。而以言者爲罪之實。是名以不言之罪罪今日。而實以言之罪罪往日耳。何以服諸臣之心。而服天下後世。臣如不言。甯獨有愧言者。其愧去者亦遠矣。激切凡數百言。上益怒。譴判澤州。此職祖歷官之大略也。若夫清白自矢。爲邑令。常祿外。纖毫歸公帑。按吳得代。餘公費千五百金。移各屬抵額賦。既歸里。橐裝蕭然。杜門謝客。理先疇。自給教子弟讀書。絕不及公府事。則至性自甘。非力爲修飾者。諸上官疏薦。無慮十數。銓部以召還請。不得則請量移。最後有榮澤之擢。而職祖病已劇矣。彌留語諸子曰。官下屬下。生死皆主恩。迄逝。精爽不少亂。蓋生平定力。頗自了徹。以至家行修備。孝友天成。拜綸命。以不迨母氏爲憾。語及輒涕泗不自勝。事先封公。盡志物之養。喪葬誠信。歲時哀慕不衰。室無旁媵。門無狎友。居恆言吾所爲不必人知。亦不必求人知者。然而人自無不知者。熹皇初。總憲鄒公南皋建議。太宰張公誠字覆疏。得贈今官。雖其用不盡究。而蓋棺論定。益可以知職祖矣。今謚典集議。職何敢私避。以遏先德。謹陳崖略。恭候大君子公評。維風勵俗。惟台衡力賜主持。篤緇衣之惠。而錫華袞之榮。職世世皆戴明德矣。

議汰麻連關文

爲清浮賞。裨公用。以裕國儲事。准本寺卿劉關文。督放白糧。月餘以來。每閱各倉。見多圯壞。地每有當換之板。上每無夾壠之灰。浸淫汨爛。長此安窮。甚且脊已滾而塗之以疏泥。壁將傾而支之以衆木。尤非計

也。進署官而計之。小壞者當小修。大壞者當大修。必兼創以爲因。庶一勞而永逸。特苦無可動之銀。將盡失。可仍之貫。乃有持簿而領麻連者。因究此項。未載典章。巡視查刷之書。辦爲大端。而各門太監。與本寺書役。亦分其餘。一年通共賞麻連二萬七千八百二十條。夫此物一條。准一分二釐之價。則此三百三十三兩八錢四分之金。奈何不以供倉中之經費。而徒爲各役之瓜分也。使爲各役工食正數。猶可言也。而細查舊規。原出額外。故名爲賞。賞以待有功。何功可賞乎。其最可執以爲名者。莫如查刷察院。每月呈進御覽。會極門太監舊例。給大庫公禮銀三錢。其後書辦。不請給銀。而改求麻連。每月二百條。若爲庫中省三錢。而不覺其爲倉中耗十倍矣。公家之物。似當先儘公家之用。今按倉廩每歲之修蓋。倉牆不時之崩砌。所需工料。總費金錢。卽科院每年臨倉收糧。備辦酒飭。以及修整硃匣火具。置買卓衣椅墊。併修斛買。揪。巡邏倉夫。各買皮襖。何項不需金錢。何不以麻連充此費。名正而體得乎。惟是事久而情慣。則割愛難。且地近而口多。則叢誘易。然倉中實有必需之費。不及今借箸。終無從出之原。額外實有不必市之恩。不自己任怨。終無停止之日。擬從今日。盡以麻連作倉中一切經費。卽歲有贏餘。併貯大庫。以待正項支銷。意圖節緩。以任急。且恩積少。以成多人之體國。誰不如我。旣陳一得。願質同心。爲此合關前去。煩爲查酌施行。

遼餉召商議

遼局未結。所需本色米豆。尙無停止之日。而其法莫善於召商。莫不善於派州縣。何以言之。米豆估價。概

溢時值未嘗無利也。召商則明年應運之米豆買於今年成熟之時。且於大熟之地。利中有利矣。卽自置自運。而總計猶自多息。故爭先爲之。每至納時。價已盡而米豆猶有餘者。勢也。一變而爲派州縣。當年運當年始買。旣不及時。又不論地。其價視初估。甯直無利乎。且召買則吾祇藉手於商。商與民交。有利無害。派買則藉手於官。官與民交。尙可問乎。宋之新法。孰非民間行之兩利者。而安石遂以病天下。則官與民交故也。原其變法。自米豆之汜爛始。彼時上納旣多。價不勝收。官未曾明諭各商。使得自糶。商亦利於無明諭。而困積以供後運。苦蓋復疏。壞於積雨。商疼其貲本。號泣求收。遂揀未甚者充運。而一入海艘。蒸鬱更甚。及抵關門。領者卻步疾呼。遂至上聞。津門不勝訶責。曰。商實誤我。盡改而派之。畿縣責成有司。全無他虞。分派諸縣。衆擊易舉。豈不自謂無弊哉。然天下無無弊之法。惟察其弊之何所底。而較其可救不可救之情。召買之弊在有餘。而有餘豈眞弊哉。財得財然後相生。比於長袖之善舞。當上納有餘。政可乘之以爲用。不則諭使自糶。勿令困積。又不則密其苦。蓋勿致汜爛。旣汜爛矣。惟有割小以圖大耳。不此之圖。以姑息誤國事。因噎廢食。改爲派買。夫派買之弊。雖聖人不能救也。弊有在法內者。有在法外者。何謂法內。畿南諸郡至津門。遠者千里。鍾致一石。惟陸運爲甚。昔熊經略主陸運。順永兩府俱至困絕。得麻城李公開北海之道。而民以不勞。今使千里爲運。是畿南又爲順永也。此弊在法之內。而非有司之過也。若夫法外之弊。不可更僕數矣。有派於地畝。而絕不與價。有名抵條鞭。而十不得二三。有派之富戶。旣不與價。復責其運。有派之地畝。而運以富戶。富戶旣同衆加徵。又偏運而費車牛。有以初出賤估徵於民。而以異

日之高估銷算於上。尤可異者。漕斛之不可語於私斛。亦明矣。照私斛以爲派。而照漕斛以爲輸。至於輸以富戶。則收者愈加刁阻。卽押以農民省察。而路費仍派民間。派之地土株累。必餘二三派之富戶求脫。更張賄賂。此又非通行之弊哉。使其行之如初議之法價。先運到官。趁初熟而糶。則雖雇車驟爲運。而費尙省。無奈價至每必後時。有司得執以爲口爭。價於上時獲漸增。今所估之價。較召商時益之又益矣。而祇利有司。不及於民也。厲小民而實侵公帑。數年之內。筋疲髓竭。千里不甯。豈不痛哉。總之惟官與民交。故至是其弊在人。而之所以弊在法。聖王惟念賢者常少。故立法之意。必極周詳。法善則小人無以肆其奸。法弊則君子亦難行其志。如近日新安。新城。獨能使民不知買運之苦。非所稱治人哉。而欲使人人爲新安。新城。雖堯舜不能。然則何以救之。曰。無他。一復召商之舊而已。如崇禎元年。徐竟間豆不過二錢五分。而一石有八斗之贏。則雖三錢一石。商猶趨赴。而畿內豆獨不登。卽初熟亦值六七錢。官與七錢。而有司尙以爲辭。此於國省乎。費乎。而况復厲民也。遼餉。天下所同加也。而徵兵運器。畿縣爲傳遞之郵。已稱偏苦。復有米豆之派買。是重加重派也。制法者亦何讐於畿民。而自廢良法。以滋不可救之弊乎哉。

城守議

京兵素未見敵。列營城外。恐以遺敵。根本重地。先以守爲主。而擺兵城上。每堞用幾人。當計也。大砲小砲。火藥鉛子。應用幾何。當計也。賊臨遠近。施放火器。用何號令。當計也。施放之法。如何措置。決可傷賊。而免自傷。當計也。守城者。何以不寒。何以不饑。何以不疲勞。而樂爲用。當計也。火器何以更番。裝放何以不忙。

藥綫何以善藏。當計也。此在城上者也。而城下何以供應。使有序而不窮。城中何以彈壓。使安靜而不亂。皆當計也。馬作何餵養。兵作何挑選。如何屯紮。以銷內釁。如何摩厲。以備出奇。皆當計也。城上城下。城中一體安靜。嚴禁訛言。專聽號令。喧譁者軍法從事。則人心專。人力齊。守無不固。戰在其中矣。而所稱號令。要出於一。多指亂視。軍所大忌也。貴近耳目之臣。各有忠義之心。祇可幫助力量。不可分撓事權。守禦之事。一責之兵。號令之權。一責之將。天下事各尋在行人做之。聽其指授。一切建異議。創新題者。皆當報罷。而後事可爲也。語云。要行山下路。須問過來人。今豈無其人乎。目前紛紛議戰。則列營於城外。議守則置馬於城上。枵腹之兵。挾不習之器。立風雪中。而不爲之所。且東挪西移。勞擾無定。特此守禦。可爲寒心。彼京將實未諳此。邊將之待用者。不可問乎。己己之變。出石亨。楊洪於獄。使總京兵。庚戌之變。宥邊將徐仁。戴綸。使之立功。此國朝故事也。今無罪之馬世龍。不可做此例出之。使一調度乎。

答友人問

生才實難。知人未易。大老人望。昭然共知者。不待言。而亦有似共知實共不知者。則高陽是也。嘗讀識時務在俊傑之語。而想見其人。從高陽四載。見其當國是紛紜。邊計錯亂之時。數語持法紀而國是定。一出決恢復而邊計定。每臨大計。當下便有規模。施行便有次第。初觀之似落落難合。而竟底於成。然後信時務不易識。俊傑自有真也。至其擔莫大之任。處至危之地。冒不測之險。歷不堪之苦。每於極衝鋒處安居。人謂其天生有膽。每以極惡草物自奉。人謂其天生好儉。而人情不甚相遠。何獨好危難而甘澹薄。則致

身一念可對天知耳。惟無一念不爲國。遂無一日知有身。膽從此生。苦從此受。而凡有血氣。孰不感發。倡勇敢之氣。而動忠義之心。於是焉在此。段境界。認國事太真。去俗情太遠。除蕭蕭老書記。以熱腸冷眼。相賞相慰於經營慘澹之餘。世人不知。理無足怪。所可怪者。併其顯然可見之功。而亦抹煞。則不成其爲世道耳。高陽未督師前。關外無尺地一民爲我有。高陽督師四載。重開草昧。奄有甯前。以及錦右。敵兵棄廣甯。退守河東。此昭昭耳目。不待推勘者。故有功無功。兩言而決。以高陽到後爲無功。試想高陽未到前。原有多少遼東。以高陽在事時爲無功。再看高陽既歸後。添了多少遼東。且高陽在事。敵何退守。高陽方歸。敵何邇來。卽甯錦戰守。折長勝之鋒。奪尋仇之氣。飲水思源。城是誰所修。火器誰所教。道將是誰所用。豈不明明具在。而乃高陽以前偏無罪。高陽以後偏有功。獨高陽爲有罪無功之人。豈不大失事理之平。令英雄短氣耶。高陽不自言功。爲志未竟也。而世遂沒其功。趙營平之言曰。兵事當爲後法。若此者。何以法哉。尤可怪者。高陽督師。爲不扶同八里鋪築城之議也。君父之安危重。遂朋友之情面輕。而掩高陽之功。反誣以壞遼者。卽出於八里鋪築城之人。非天子神聖。幾不能免。情面之不易破。至是。令有心爲國者。何以措手哉。

同難錄序

今上御極。手殲大憝。九鼎晏然。因追贈慘死諸臣。恩命煌煌。已復俞部司呈請。不盡待諸孤陳乞。概照贈銜。給與三代誥命。蓋曠典也。諸孤以爲吾儕望恩。原不在廢敍。但祈有以光先世。爲先人了人子事耳。至

是而聖明所以卹忠與地下之因忠以盡孝者罔有弗竟矣。遂各述先人受禍受恩始末名同難錄。蓋以志其感恩。亦自訂後期也。梓成。徵弁語於余。余思諸臣受禍之慘。振瑾時所未有。天子聖明。不難創行前所未經有之典。以當之。自有此命。令人曉然爲臣盡節。受非常之禍者。朝廷自有非常之報。旣以慰死。兼以勸生。或謂有待慰之魂。則死者之忠亦僞。有待勸之意。則生者之忠不純。以報持論。得無令死者不服。生者不受乎。嗟嗟。論不期高。期於中情。使論忠者必不論報。是爲忠臣者必生旣備受荼毒。死復備受蕭條。天日空慘。邱壠無光。而後爲盡己忠。而後爲朝廷之所以成人忠。則忠義一路。祇爲齏粉。髮膚寂寞。祖父之具。此又與於不忠之甚者也。夫忠義固出天性。其萌甚微。利害當前。立喪所守。况生死乎。所以噓之使動。養之使長。全在君天下者。故曰養天下而享天下之謂君。然不經喪之者之毒深。無以見養之者之功大。前此善惡倒。宇宙晦。縉紳喪節。亙古所無。豈人性固然。亦竊君權者之刑賞。實能喪之。日月幾何。至今上而人復知善之不可泯。惡之不可爲也。亦豈人能遽復其性。則今上之刑賞。實養之耳。刑以報惡。賞以報善。報之一言。持論不高。舍此無以養天下。而皇上神聖。其用意深遠。每非臣下所能窺萬一。如言及逆黨。人孰不恨之。詈之。欲食其肉。未幾而漸平矣。言及諸忠。人孰不憐之。痛之。至於下泪。未幾而亦漸平矣。漸平漸忘。且託於見善不喜。聞惡不怒之說。而復厚誣吾君。於逆案欲從寬。於褒忠欲從嚴也。至欽定逆案。懷焉天討。而三代誥命之給。卽在此時。然後知聖主善善惡惡。不爲衆淆。不以久倦。且不因煩生厭也。肯持忠不望報之論。使爲惡者畢竟得利。爲善畢竟不利也耶。余按是錄。讎諸孤而與謀。皇上旣有以

報諸臣。諸孤能不爲先人報皇上。是時相期。誰謂不切。所貴者母以久而亦平也。今而後。竝期自勵。無墮家聲。乃卽所以報君恩。爲諸臣請誥命者。係封司徐君主稿。於例爲破格。於事爲變體。初亦虞上慎重。而竟不難得。蓋徐實善體上意也。余因序斯錄。而并紀徐之憐痛未平如此。

送李元素提督操江序

元素奉命操江。行有日矣。習知元素者。謂無不可爲事也。習知操江者。又謂無不可爲人也。卽拜命之日。人皆爲彈冠。而元素獨捩腕。若果不可爲者。夫以陵京重地。特設重臣於江上。操利兵而誰何。祖宗深意在焉。乃相因至今。所稱水犀之甲。萬有五千者。僅存三之一。而餘皇三百。且不能十之二。六千脆卒。駕四十戰艦。分布於千五百之江面。落落不能如晨星。而不許巡江之議。復起黜巡而言操。是兵可不論地而稱生勝。爲不知兵者之言也。天下事未壞可爲。旣壞不可爲。小壞猶可爲。大壞遂不可爲。無惑乎元素之捩腕也。然余於此。下一轉語曰。天下事未壞不必爲。小壞不可爲。可爲者獨大壞耳。何也。事明與時衍。而暗爲時移。一日不覺。卽一日苟沿。然其猶有可沿。卽其壞之未盡。據未盡壞之文具。塗飾眉目。儘可偷安。陰委不可知之禍。於異日不可知之人。故曰不可爲也。嘗聞刻畫苟沿之病者。其漸移暗轉。令人筋骨幾化爲木石。而不自覺。若中蠱。卽心若有覺。而呼吸之地。已爲所制。心可得知。而聲不能出。若中魘。蠱人魘人者。其狡若獠。食人之髓。而人以爲搔其癢。髓不枯。癢不止。受蠱受魘者。其昏若俚。骨血已碎於異物。而神魂迷惘。甘爲前驅。有此四者。不底於大壞。其勢不止。惟壞者旣大壞。沿者無可沿。容蠱受魘之地。俱空。招

猱使俵之緣齊斷。而其時又必有交發之難端。蓋國家不能百年無事。氣運每以多難興邦。事變交迫。斯英雄措手時耳。元素之先盱山君。嘗三任操江。爲肅皇倚重。讀其制詞曰。整飾戰船。操習水戰。凌夷至今。且無戰船。於何整飾。且無水卒。於何操習。向之操江。以捕鹽盜。今日閩賊。志未可量。廟堂之處分。又未敢深言。賊之卒若虎。舟若龍。數倍於我。揚舲乘便。則操江之原。以壯根本者。且急而爲禦門庭。從前所稱不可知之禍。今卽其時。所稱不可知之人。君非卽其人哉。君卽欲沿而無可沿。又事變之迫。不容沿。此政蠱窮。斃解。猱飽俵醒之時。天下乃可爲也。而爲之者。幸值元素。逢元素者。不辨其爲勳貴。居恆脫去膩習。一編之外。時彷彿。習之者。所以謂無不可爲事也。君故曹國裔孫。高皇帝見舅如見孃。一語卽山陬海隅。無不借以芬齒。而余復從元素得睹高皇帝手敕。時稱乳名。卽二百六十年。精神淋漓。如昨日事。故語臣節者。必曰報國。而元素之於國。卽其家。以爲國事。則猶可諉之人。以爲家事。則無論可爲不可爲。無不爲之理。况事理事勢。相乘相薄。必至不可爲。而後可爲歟。或以爲國家事權不專屬一人。卽操江之使。烏能自行一事。君卽欲修復職掌。而轉關之處。挪揄易生。脣焦肝沸。誰其聽之。余則曰。有是言也。不聞求牧與芻。而不得一段公案在乎。從前無以職掌爭者。其志可知也。爲國事。則萬五千之水犀。三百之餘皇。闕一恐不足以濟緩急。若志不爲國。則諺有之曰。管三人不淡食。况水犀六千。餘皇四十乎。爲國自爲。兩言而決。元素不難爲知罪之孔距心。寥廓宇宙。豈遂無爲王誦之子。與出其間哉。是在元素矣。是在元素矣。余因允諧以識元素。暨超之中。涵數君。皆雅相期許。以無負聖天子中興之運。故於其行。不能作泛談。而

直致若此。

景逸先生像贊

莫謂象非真。先生之神。原在象外。莫謂象無言。先生之意。原在言外。且非卽非離。何內何外。卽外而鬚眉。更外而衣帶。而冥吾神。以爲盤礴。引吾意。以爲刻畫。則先生之辨賢奸如著蔡。持是非。忘利害。了死生。無芥蒂。孰不以爲撐柱兩間。震耀百代。然總於此粗而不足。按之鬚眉。離而不相屬之衣帶。而無不一具在。嗚呼。是東林滴派。洙泗正脈。子高子之真。任憑弔者之下拜。

與考功司公書 同徐斗南張重光

隴州知州劉昌胤。既陞南京錦衣衛經歷。胡撫有疏。追論其變法徵糧。大爲民害。中間開款。多後官事。明謂或出州官之徵斂。或繇衙役之侵收。雖云因陋襲訛。實繇變亂成規。則劉昌胤有不得辭其責者。蓋事皆三月至六月事。昌胤之離任已數月矣。後官既鮮幹材。致滋多弊。何與前人而追論之。卽聖人作法。能使後世之無弊耶。何以服天下也。且其所稱變亂成規。更有可駭異者。疏云。隴州每里原設收頭。劉知州增設義民。與皮鞭一條。下鄉打糧。民畏威完納。夫糧之完不完。非細事也。皮鞭而可完。又何尤焉。卽稱畏威。亦何必併此威而無之。而隴州完糧。實未試蒲鞭也。隴糧止完三分。舊矣。其相沿之法。每欲催徵。則收頭里長。共斂民錢。以求寬限。權在吏書。則買吏書。權在左右。則買左右。催一番。卽斂一番。更雇慣捱比者。幾人。苦捱兩次。卽以爲三分之數。原不能增。代陳民隱。容其拖欠。此莫非糧銀。而不得爲糧用。里書既恣。

蠹食官吏且同鼠眠。永以拖欠之名予民。以空匱之實予國。勢已極重而不可返矣。劉知州洞悉弊原。遂盡除舊法。不用衙役而用義民。不用刑罰而用勸諭。明與說破。謂小民雖未完糧。實已費錢。與其以錢飽奸人而負拖欠之罪。何不以錢完正項而成忠順之民。當是時。衙門內外無一人敢索小民之錢者。但有一錢。卽得完一錢之糧。人孰無良。羣然從義。從前止完三分。遂突然完九分。申解之文。蒙上官有空谷足音之褒。此功耶。罪耶。使完糧不爲功。變法遂爲罪。是不完糧之法。爲良法而不可變。是錢糧之正數。爲虛額而不必完也。國家最急莫如財賦。邊餉年年壓欠。處處脫巾。甯遠至於戕撫臣。則糧之完不完。其所係何如其重有一人焉。於久不完之處而能完。更於衆不完之中而獨完。是當如何獎拔以爲風勸。而乃爲陋規作護法。詆功首爲罪魁。秦吏尙可爲耶。國事尙可爲耶。大要劉知州做人做事。學古認真。不行餽併不謝薦。以此取人重。亦以此惹人嫌。卽完糧一節。舊日慣使寬限錢之衙役。痛恨以爲斷其喉。同時不完糧之庶僚。深忌以爲形其短。以爲不處若人。則寬限錢不得再使。九分糧只得常完。毀言日至。卽故撫能不墮其雲霧中哉。然卽胡撫之言。亦曰。第念其志在急公。才有可用。則本心不能全違。已見乎辭矣。夫當今之時。而有急公之志。可用之才。不破格拔之以救時。而於錦經一秩。尙爲擲揄。此志士之所以負戟而長歎也。惟台臺爲國事惜人才。爲官常持公道。使志士本色。遭詈詬而益明。終得伸其眉宇。爲國家效一臂之用。其於世教。豈云小補。劉知州爲某同里。熟知其爲人。更爲某舊屬。熟睹其當官。非敢爲游詞以眩名實也。

與賀中冷書

國用不足。聖主責成計部者至矣。計部思所以副責成之旨。當按財用之所以出者大端何在。而通爲一體。而後州縣考成之法。與撫按之舉劾。銓部之黜陟。通爲一體。而後州縣之拖欠漸銷。軍國之經費漸裕。夫人情所趨者權也。天下之權。外在撫按。內在銓部。而計部之權。輕於飛羽。且內之黜陟。一憑外之舉劾。則銓部原與撫按爲一體。獨不一體戶部耳。當戶部極輕之時。固不能於銓部前與撫按爭權。而值國用極乏之時。又不能於聖主前使銓臣分罪。爲司農者。尚不特地立起。拿定主意。以自爲計者計國乎。司農而不自爲計。誰肯爲司農計。不完糧者。銓部既徑爲陞。獨完糧者。撫按反明爲劾。如陝西胡撫參隴州知州劉昌胤。爲其變法徵糧也。隴糧從前止完三分。劉知州遂完九分。不賞其完糧。而尤其變法。是明以三分之完爲良法也。處一官而阻急公者之心。借欠糧者之口。從此不完糧者不止秦吏矣。朝廷再有何法以裕經費。計部再有何策以副責成。翁臺有心人也。又貴衙門事。故敢商之。

與徐明衡書

別來情事。從何處說起。昨奉謁。值兩大老在坐。故不敢進。念仁兄此時政忙。何敢必於求面。惟素忝道義之交。有不容不及時以聞者。被難諸賢。同膺聖恩。而三代誥封。周蓼洲郎君之請。已奉俞旨。各家子弟。事屬一體。欲共陳乞。自厭紛然。望仁兄總疏題請。則一舉而諸家之事完。已具公呈。候投臺下。緣諸公子住處。俱在弊寓前後。不時相晤。遂以呈稿來商。其情切。其理順。仁兄仁心義膽。必有語未終而據案起者。無

待弟饒舌也。此事須得仁兄做精神掩映。決於國典有光。而諸賢之目可瞑。仁兄不後不先。以是時至。造物未爲無意也。

答徐明衡書

昨午前得仁兄傳來旨意。令人平地躍起。午餐加倍。至夜喜不寐也。今復讀疏稿。明剖不待陳乞之理。明酬痛快。怪不得俞旨天降也。世間真文字。從真肝膽流出。而肝膽者原人所同。然特患在己不真。故不能動人。而猥云天下事不可爲。豈不厚誣聖天子與賢宰相哉。謹卽傳致各公子。

復張石林書

款段長安。未敢於風塵中開眼。傀儡中開口。獨喜接故人書。不四六。不寒溫。直道肝膈。無異以清冷漿醒頭目也。雲中原是重地。而況在此時。天幸安排仁兄於此。邇讀大疏。痛切明鬯。原是近裏著己工夫。而人以爲虛恢。爭爲款局左袒。彼八十五丈人。原特受撫虜官銜。其主款是衙門本色。特朝廷起丈人於田間。使督宣大。則卽總督二字。戰款俱在其中。奈何單標之曰撫。西虜戰守和三策。操縱在我。無不可用。而款不可明以爲題。以款爲題。則一步動不得。故西事之壞。壞於以撫虜字入總督官銜中。從來無此體。無此理。弟於田間見此報。卽對親友。謂宰相須用讀書人。撫虜軍門。載在何典。固不待近日議論之柄鑿。而始知西事之可憂也。旣主於款。仁兄在此何用。卽滿將軍亦何用。然又不肯放仁兄。則此懷良苦耳。

答袁自如書

恢復之議。翁臺呼而高陽應。恢復之事。高陽鼓而翁臺舞。乃甯錦屯防而高陽罷甯。錦戰勝而翁臺罷。誰實爲之。誤乃公事。幸聖人御宇。專起臥龍。中外臣民。慶底績之有期。交相慰也。復見大疏。爲高陽剖白。一洗近歲之陰霾。再見本來之面目。凡在簪紳。爭爲傳誦。翁臺豈阿高陽者哉。翁臺之任。卽高陽之任。則高陽之案。卽翁臺之案。高陽之誣謗明。則翁臺之展布易。此可爲廟社慶者也。

與袁自如書

高陽公爲八里鋪長城。獲怨於王帖雲。此自因翁臺大議起。不待言也。帖雲修怨高陽。而借馬茅爲題。此其心事。路人所知。亦不待言也。兩人俱當對簿。茅以中途患病未到。馬則久繫囹圄。屢經審問矣。原參項款。俱無踪影。而當事者必欲深入。明知其無實跡。只要強坐。總之帖雲餘毒所螫。朝士墮其雲霧。未易驟解耳。昨大司寇忽過敝寓。問馬世龍事。弟不能作違心語。直頭直腦。陳馬帥有功無罪之狀。兼述帖雲報怨高陽。借手茅馬之詳。且謂再創河東。奄有河西。實高陽用翁臺之議。而馬帥奉以周旋。四年間無一事不從。三人手中過。今督師公見在軍中。何不以馬帥事問之。而必據無影之參疏。強求硬坐乎。司寇云。亦爲馬帥屢審。欲定其罪。又無實蹟。已作字問督師公。求他實實寫來。弟踴躍許之曰。如此則事蹟自有卷案。功罪自可明白。以前之功罪得明。則以後之邊事可做。非小關繫也。司寇意似稍動。而未知其字已徹視否。夫馬帥之事。卽高陽事。而高陽舊日之事。卽翁臺今日之事。且高陽與馬帥舊日所行之事。又皆翁臺舊日所同功一體之事。曩者高陽錢糧事。舉國之誣謗。得翁臺一疏而立明。則今日馬帥事。非借翁臺

片言。誰爲雪其冤者。司寇忽發請教之意。此天不欲使馬帥終苦覆盆。高陽復墮坑塹。而使乞靈於補天之手。然馬帥在遼四載。豈能一一盡得人意。則今日乘危下石。難保無人。持公道以全大體。全在翁臺主張耳。司寇字或未及茅。而回札不妨帶雪數語。此自關邊計。非直交情也。

與沈彥威書

弟以同門爲編氓。眞屬奇遇。而半年來不敢輕通寸楮。以瀾清嚴。非獨引分甯直避嫌。實以老公祖一臨易水。宇下二十城。總無不平之事。卽懷愛助之心。無可借題耳。而居恆以未効一得於知己之前。不無寶山空回之恨。今乃幸有可借以裨高深者。得諸地方士民之口。聞見極確。關繫吏治最大。急爲老公祖陳之。新安胡令士棟。近未列薦。不知何故。上谷吏治。固稱多賢。據實而論。如新安之徵糧平收。粘重納姓名於壁。仍令領回者有幾。如新安之問理惟願和息。不事贖鍰者有幾。如新安之買辦一照市價。不苦行戶者有幾。如新安之供應上官。不用富戶。件件自辦者有幾。如新安之箝束佐貳。不生事。嚴戢衙役。不下鄉者有幾。且徵收卽平。而合封不無微羨。卽以本地之物。用之本地。如戰馬之買解。誰似新安於發價七兩之外。官自補足。而民不擾。遼餉之米豆。誰似新安絕不僉派。令殷實吏就天津買運。而民不知。如靜修祠之重修。先以分貲爲倡。如仇孝子之給絹帛米肉。月以爲常。孰非以新安財。做新安事哉。至於錢糧則清積年之飛洒。於葦產則釐豪猾之蠶食。不無一家之怨。實聞滿路之歡。而迎春悉裁陋規。船稅悉罷徵權。娼優不敢入境。擣菹俱已潛踪。又未易更僕數者。若不論資格。惟核治狀。上谷二十城。當以新安爲第一。

而近乃不得與薦。此異事也。以如是官而不得薦。必有中傷之者。蓋胡令即得千萬人之心。而未必不失。一二人之心。其千萬人之知感。雖出公道。而未能操殿最之權。其一二人之隱恨。雖出私情。而或能參異同之議。此於吏治。關係不小。察吏安民。係老公祖之事。想於按臺復命。必力爲推轂。而此時新安令頗聞有去志。新安民恐失其慈母。卽弟密邇隣壤。熟聞輿論。亦愕然若有失。惴惴然恐事之再誤也。故據以入告。聊自付於高深之一助。而更爲風勸有司。勿以愛民爲覆轍。相率爲剝民之事。蓋共以剝膚之災。求救於菩提心霹靂手。非徒爲邑令抱不平也。

與袁自如書

前書已發。而馬使持翁臺。回戶部咨來。展讀數過。可勝感服。適蔡兄在座。細爲商榷。帖雲陷馬。原所以陷高陽。則欲爲高陽。只在雪馬。馬帥初到。問官儘欲深入。因邇來長安公論漸明。人情歸向高陽。爭有東山起謝之思。故於馬之獄漸寬。而請教於翁臺。蓋明知馬帥之事。卽高陽事。而翁臺前爲錢糧出疏。以雪高陽。事屬一體。必相呼應。政欲借翁臺之語。以爲雪馬地耳。翁臺大咨。情理曲盡。而有疑者。柳河原係哨將。接難民。已經高陽奏過。今云欲渡河斬級。似宜再酌。恐深文者借爲難端。通璫一段。似可略寬。蓋馬在罪中。禁受不起。翁臺之語。尤禁受不起也。咨中有此二段。馬使難脫。高陽便不得乾淨。弟與蔡兄愚見如此。又聞蔡兄述翁臺千里相念之意。故有所疑。不敢不明質於翁臺。亦所以報知己也。

與袁自如書

大咨再至。是滄淵救命符。爲人須爲徹。於寅翁見古誼。然豈從一武弁起見哉。國之大事在戎。而卽戎之患。莫大於局外掣肘。腦後算帳。冷盡豪傑任事之心。今藉寅翁力爲疆場効力人。爭些地步。有益廟社。豈曰小補。蔡兄無能。其肝膽寅翁所重。其潦落寅翁所憐。今有字往候。併致高陽相公書。蓋海內聲氣。能有幾人。黑水白山。政英雄精神所刻畫。臨風東望。可任依依。

與張石林書

年臺治兵勞苦。而聖主不憂西顧。弟與朝士。總席年臺之勞苦。以爲安樂。古來聖賢豪傑。精神橫互宇宙。有一不向勞苦中結成哉。滿帥固東方所指爲驕悍者。一遇年臺。竟成平勃之驩。此自年臺爲國起見。初非曲徇於滿。而滿自分一老革。何以得此於撫軍公。鳴感遂欲嘔心圖報。且欲捐脰。弟於滿之感恩。而益信年臺之善將將也。聖主安得更憂西顧。朝士安得不優游委蛇。席年臺之勞苦。以爲安樂哉。男兒生世。身爲天子鎖鑰。使舉世借以爲安樂。亦足矣。敢因鴻便而颺言。

與滿懷丹書

不佞借庇序轉。實愧素餐。乃辱故人遠念。旣懼無以答君恩。復懼無以酬知己。惟是身逢盛世。將相得人。使蹒跚病骨。得優游委蛇。所稱厚幸爾。夫以石林年兄之肝膽材略。而共事一方。自是奇緣。台兄自能見重於石林。非關不佞也。前得石林手字。自述其交驩之意。總從爲國起念。疆場有兩大賢。率土所共借以安枕。豈獨相知者一人之私慶哉。

答張石林書

論邊計疏於邸報見而荒政略纔讀於刻本極重仁兄極疼仁兄又極服仁兄天下再得幾個真爲身家真爲性命者布列於重鎮何款局之不可罷何聖武之不可揚也弟與徐老師比鄰而居每相過對談輒以仁兄事爲燥脾徐老師分考一番摸索得真正英雄於最重地最急時爲國家撐天拄地是大得意事而同門如弟隱隱借光不禁其說項也特三復淚從腹中下一語不無同病之感弟四年於遼腹中飲淚多少仁兄曾於郵筒中慰我則今日相憐自分比他人不同此亦可共滿懷丹道也

答范夢章書

巴不得仁兄做封卽墨烹阿之事痛快一番又巴不得以真聞真見幫助仁兄借人酒杯澆我磊塊然天地間第一快事卻禁不得一字不的確無心腸者勿論卽有心腸矣而眼界未必到耳根未必清或爲成案所封錮或爲奸人所顛倒儘力做去反貽千古之憾弟何敢忘仁兄臨別握手之語而欲求一當更不容草草會人既恨不能多聞言又恐不足信天下事眼見是實耳聞是虛仁兄身到地方樁樁都該眼見不可靠耳聞况揣形模影於數千里之外乎州縣事都有項款按款課簿無處藏躲只要箇箇面他時時問他聞邱毛伯月課簿亦實有益只不宜問罪以法而累意仁兄集其長去其短則秦鏡在懸課實不必問聲也且巡撫二字不相離不巡何以爲撫常巡則守令情狀一一目睹或慮車徒騷擾飲食若流此易易耳簡其儀從止其送迎自備費用誰不樂其簡便哉聞節推可任者張瑤之透爽衛景瑗之真切尹明

翼之執持。皆留心定事。有益地方。太守王建和。有古人風。屬吏無敢送一菜。弟所聞若此。然總不如仁兄親見。其人之足憑也。此以後仁兄日有所見。日有所行。當時以教我。弟或偶有所聞。不難頻寄以備參酌。聞中州惡俗。好告讒狀。假捏籍貫。串通彼處衙役。作奸取利。有石維屏作道。於狀尾卽印以冒籍徑繳四字。而讒收之害遂除。人皆思之。今不知尙有此風否。仁兄前不知此狀可到否。聞往時上司批准狀。有司繳還。每逢其怒。故石道爲人所思。明衡憂歸。時事日異。何處著手。何處開口。所恃者聖主原無成心。時有變局耳。天下治亂係宰相。掌舵無人。奈何奈何。

答方仁植書

台翁行。弟以病不能送。未幾遂居圍城之中。無路延舊醫。隨緣用一醫。幾無生理。今借庇漸有生機。而身尙不能見客。手尙不能作字。手札娓娓。具見憂時熱腸。恨推轂高陽不蚤。國事一旦至此。猶幸此時猶得高陽之一出。以濟艱難。同志諸人。費盡推挽。雖未獲之綸中。然繇今觀之。祖帥之洗心報國。敵縱從永平。不能長驅而東。則關門之駐。似有定數焉。邇來兵氣振揚。斬首已逾一千六百級。而設伏用間。俱有深機。圖永圖遵。已酌次第。天心助順。想狼煙不難靜掃也。馬帥身扼敵衝。鴻橋一戰。大著奇捷。而責備猶然未已。總因朝士知兵者少。急欲敵退。以釋其全軀保家之懼耳。赤城公祖。想亦爲衆論所持。數數催戰。今既謝事矣。未敢保接手者之知兵否。高陽有疏。深破文士之舌。幸本兵不作異同見。但得大家省言。讓邊人自規進止。敵不足退也。果徼社稷之靈。卻退敵兵。便是高陽退步時候。人固不願其入中書堂。卽高陽亦

甯復作黃扉夢乎。弟一病纏綿。久思歸計。第以時方多難。未忍投閑。解嚴之時。當問弟於長林豐草中矣。我輩十年來。死生思難。何事不經。而雞肋烏紗。夜行不已耶。台翁同心者也。敢爲誦唐句云。世事浮雲何足問。不如高臥且加餐。

